







王堂類稿卷第十

周益文忠公集一百十



賜臣僚請免批答

乾道六年

賜左正大夫守尚書右僕射虞允文辭免脩進  
勅令書成轉一官加食邑一千戶實食封四  
百戶恩命不允批答 十月三十日

省表具之朕欲道揆明于上法守明于下君子無犯義  
小人無犯刑念非憲度昭著布在方策則雖有美意孰  
從見之卿以宗工鉅儒總領衆職屬者會粹法令至二  
萬二千有奇煩複者刊躋駁者正一代典則粲然可觀



異時折言破律之姦寄請他比之衆庶幾盡革厥功茂  
矣崇階多邑賞未為過卿猶力辭何也况朕方以爵祿  
砥勵天下若丞相有勞弗酬謂群臣何陳義雖高尚勉  
承之所請宜不允

賜皇子慶王愷上表再辭免加食邑食實封恩  
命不允批答 十二月十一日

祭者澤之大著于禮經今朕推禋祀之慶徧暨群辟雖  
輝胞翟閭猶將加惠矧予賢王有肅雝之德有陟降之  
勞丕視功載陪敦厥邑所以均帝祉協彝制也曩封游  
至兢：然以傷廉為懼執謙過矣書不云乎無有作好

遵王之道朕豈以是私汝哉所請宜不允

賜皇子慶王愷再上表辭免加食邑食實封恩  
命不允仍斷來章批答 十二月十三日

省表具之朕躬展明禋翕臻純嘏配天其澤已浹于萬  
方裂地而封可遺于諸子肆加邑采用廣神釐既再命  
之甚勤何三辭之復至惟西漢畀連城之賦而東京開  
半楚之疆由今而言視古已薄在照臨固非私矣于辭  
受尚何愧哉所請宜不允仍斷來章

賜皇兄居廣上表再辭免加食邑食實封恩命  
不允仍斷來章批答 十二月十六日



省表具之朕迎陽徧饗單竭誠敬既受帝祉不敢專也  
上焉歸美於庭闈下焉餽惠于臣庶而卿獨辭多邑之  
封豈朕與宗族同福祿之意哉傳不云乎庸勲親之  
近尊賢德之大者也體是四者毋稽我成命之行

賜鄭藻上表再辭免加食邑食實封不允仍斷

來章批答 十二月二十日

省表具之邦有大賚自貴戚始古今之通誼也卿在后  
族為耆舊于右列為首冠雖不與祭而有典衛宸居之  
勞加地廣恩毋庸再避且人臣以辭寵為高固未若居  
寵無愧之為賢也其尚懋敬之哉

賜奉國軍節度使同知大宗正事士銖上表再

辭免加食邑食實封不允仍斷來章批答 十

二月二十一日

省表具之朕甚重爵賞不輕假人以卿糾合宗盟相予  
肆祀既均帝澤乃益爰田古有執膳以親同姓義無可  
避豈必再辭

賜昭慶軍節度使致仕劉懋再上表辭免加食

邑食實封不允仍斷來章批答 十二月二十

九日

省表具之古先哲王罔不明德恤祀亦罔不配天其澤  
粵朕紹服其曷敢不勉乃十一月壬午誌祀于上下歛



時多福敷錫有眾越在內百僚庶尹暨在外侯甸男衛  
邦伯咸大介賚爾矧敢遺里居之舊豐爾邑厚爾祉以  
熙天休命往欽哉毋庸固辭

賜威武軍節度使主管侍衛馬軍司公事李顯  
忠再辭免加食邑食實封不允仍斷來章批

答 十二月二十三日

朕以誠敬事天、以祉福遺朕思與文武之士同此慶  
成之恩而卿典司羽林拱護鸞路眾無譁教人服簡稽  
賦邑雖多眦功為當再辭過矣其懋承之

乾道七年

賜尚書右僕射虞允文上表再辭免轉左光祿  
大夫特封成國公加食邑食實封恩命不允

批答 正月二十二日

省表具之朕若稽帝舜期盡事親之道亦惟有若臯陶  
之臣左右厥辟率作興事濟登孝治乃者制禮作樂交  
舉典冊慶成之日天人並應溫、其和熙、其春時乃  
之功惟朕以擇祚封命秩疇不謂宜卿辭雖堅命弗惟  
反且君猶元首臣猶股肱一體相須何適非均其尚喜  
哉共此榮樂

賜參知政事梁克家上表再辭免轉一官恩命



不允仍斷來章批答 正月二十四日

省表具之朕允迪丕天之大理並增太上之顯號開闢  
以來詩書所載未有若斯之盛禮也卿以名儒服在近  
弼竭贊襄之力宣潤色之勞進官一列賞未為過乃曰  
歷考前聞邈無近比願固辭焉夫以國家非常之慶既  
匪前聞可擬則輔佐非常之寵亦安得以近比為言哉  
既却奏封尚承朕志所請宜不允仍斷來章

賜皇子慶王愷上表再辭免除雄武保寧軍節  
度使判寧國府進封魏王加食邑食實封恩  
命不允批答 二月十一日

省表具之朕昭示大功靡私諸子厥惟稽古乃俾殿邦  
汝植性溫純賦才通亮居有謙和之德動無驕侈之愆  
列却十年備見恪共之度出藩千里方觀牧御之能載  
荒比國之封疆疊畀東陽之旄節初非作好足以服人  
昔漢重藩維時則有間平之善唐分督刺時則有餘霍  
之賢尚勉繼于前修毋力辭于定命

賜皇子恭王某再上表辭免立為皇太子恩命  
不允仍斷來章批答

省表具之朕深維國本屬在皇儲日問寢門將以教天  
下為子之孝時修齒曹將以訓天下為臣之恭念典禮



之攸崇寔古今之所重汝聰明天賦譽望日彰博通詩書禮樂之文兼備仁智中和之美久養成于德器肆祇協于邦彝筮從良索之三象應離明之兩臨軒授冊方肇舉于盛儀削牘抗言必難回于成命亟遵前詔庸對慈懷

賜皇子慶王愷再上表辭免除雄武保寧軍節

度使判寧國府建封魏王加食邑食實封恩

命不允仍斷來章批答 二月十二日

省表具之三代令王封建子弟非特示親之思明貴貴之義亦以蕃屏王室有彊幹弱枝之助焉稽諸典命

凡自王畿出封者車服禮儀皆加一等則夫雙節之重大邦之啟既協古制亦華爾行汝其敬乃僚又我民毋適宵人毋好逸豫使朕心朕德敷于南國則爾身雖外朕固不忘爾褒也寵章徽數其又奚辭所請宜不允仍斷來章

賜皇太子上表再辭免領臨安尹恩命不允批

答 四月二十九日

省表具之朕應圖太上省方吳中市獄浩繁舟車湊集異時置守以一切治辦為能未足以隆行都觀萬國也茲庸稽古復尹正之重以汝金昭玉粹海潤山暉敏足



以對長安之日智足以辨陳留之牘必能明治理達人  
 情庶幾翼：極之風焉詩不云乎邦畿千里惟民所  
 止肇域彼四海言為政自內而及外也其以問安講學  
 之餘推廣德意致來假之助俾朕百祿是荷豈不賢于  
 辭遜乎所請宜不允

乾道八年

賜虞允文再上表辭免特進左丞相兼樞密使

進封華國公加食邑食實封恩命不允批答

二月十四日

省表具之朕觀黃帝時風后力牧常先大鴻俱謂之相

所以贊襄治道無所不統非若百官有司分職而守聯  
 事而治也徇沿寢久乃或失輔弼之旨自我復古夫豈  
 徒然卿碩大光明裕和忠肅三年宅揆四海具瞻予欲  
 綏靖華戎卿則竭誠而匪懈予欲修舉法度卿則愛日  
 而有為不正其名何以賓寔謂當亟拜安可固辭昔舜  
 命大臣雖嘗濟：相遜及告以往哉汝諧之後未聞繼  
 請也典謨可考其懋承之

賜梁克家再上表辭免除左正奉大夫右丞相

兼樞密使進封清源郡開國公加食邑食實

封恩命不允批答 二月十四日



省表具之維我烈祖之有天下也創設政之官亞公台  
之重進遷有漸名寔用字率而行之二百餘載矣得人  
之盛視古有光肆予纂承其敢怠忽卿閱深博達恭肅  
通明參秉事樞三年于此朕心察其精白識者聽其謀  
謨膏澤加乎斯民貴名薄乎四表逮茲定揆誰復間言  
昔商周拔相田野之間漢唐取人卿士之列借曰辭避  
猶弗聽也豈有協贊朕躬之久灼知情業之優以序而  
升遵吾家法乃可聽其執謙而寢揚庭之號乎

淳熙二年

賜簽書樞密事李彥穎上表再辭免除叅知政

事思命不允仍斷來章批答 閏九月十二日

朕惟願治之君以知臣為急有志之士以逢時為榮相  
得益章古人謂之千載蓋難之也今朕拔卿十年之間  
寘諸二府之列有為則汝聽有言則汝從明良相須庶  
或無愧茲由樞筦晉翊台衡匪卜匪占實惟朕志蓋軍  
政明然後可以圖國政武事飭然後可以修文事茲不  
易之序也卿其思古今遇合之難展疇昔經綸之蘊共  
恢遠御亟格多盤舊次姑安非予所望所辭宜不允仍  
斷來章

賜翰林學士王淮上表再辭免除簽書樞密院



事恩命不允仍斷來章批答 閏九月十二日

朕惟武王興周必資十亂高祖造漢實賴三傑今兵布于中外者至衆事繫于幾微者至多雖朕昧明求衣當饋輟食思欲銷未形之患成中興之謀自非二三大臣相與聚精會神力致交修之助則亦未見其可也卿回翔著定邁嚴徐之文從容禁廷蘊頗收之略朕有意用之久矣逮茲出命人無間言夫謀議決于帷幄之中而利害形于華夷之內朕固不容輕授卿亦安得固辭勉希昔賢趣就勲業所辭宜不允仍斷來章

乞改正批答紙樣奏 閏九月十二日

契勘本院每遇批答臣僚章表例用尋常詔紙連接書寫長短大段不得問之掌故並無依據近搜訪到仁宗皇祐間批答孫沔辭免副樞表所接之紙高低相若謂合改正今因李彥穎王淮斷章批答當謹院照皇祐體式書寫進呈如得允當欲自今後准此施行伏取進止

閏九月十二日奉御筆批依

淳熙三年

賜皇叔祖嗣濮王士輅上表再辭免少傅恩命

不允批答 正月十日



朕嘉成周之隆多同姓之助無我老耄衛武有百年之  
歲俾爾壽域魯僖存千歲之頌乃眷宗盟之長厥惟安  
懿之孫既屬近而行尊亦年高而德劬克備多福庶幾  
尊聞乃因慶禮之崇成益進孤班之特揖益爵齒俱先  
予在列故恩榮獨異于諸臣是謂建一官而三物成豈  
徒親九族而萬邦協何未孚于至意願猶拘于常謙其  
寢需章往承贄冊所辭宜不允

賜叅知政事龔茂良上表再辭免進太上日曆  
特轉兩官依例加恩：命不允仍斷來章批

答 三月九日

省表具之朕觀堯典所記皆堯德也孔子乃繫之虞書  
非以鋪張揚厲至舜而後備欵當是時又有伯益諸臣  
于七十載翼位之後舉乃聖乃神乃武乃文之德而申  
述之至今堯言布于天下者舜君臣歸美之力也如朕  
涼菲固不敢自比于重華而太上功烈壽嘏視放勳益  
有光焉然則成書千卷寶為大訓不在此時乎卿以貳  
政之臣效伯益之贄疊陞階秩顯荅儒猷公論謂然何  
引避之堅也所辭宜不允仍斷來章

賜叅知政事李彥穎上表再辭免進書禮儀使  
特轉兩官依例加恩：命不允仍斷來章批



答

省表具之朕<sup>被</sup>堯之衣誦堯之言行堯之行十五年于茲矣既哀矣興善政凡九百五條以舉其宏綱又會中興故實至三百篇以撮其要猶以為未也趣千卷之書紀三紀之事消辰備物親帥群臣進讀于德壽之庭肇自顯穹生民以迄乎漢唐有此典禮乎無也惟予近弼實相盛容正使推恩不著于舊規猶當以業鉅事叢而創行之况二府領使有相承之例乎卿其勿疑亟服嘉命所辭宜不允仍斷來章

賜武康軍節度使捧日天武四廂都指揮使提

舉隆興府玉隆萬壽宮吳拱上表再辭免除右金吾衛上將軍恩命不允仍斷來章批答

四月十二日

省表具之國朝之制自刺史至節鉞為正任之極自諸衛至執金為環列之極惟其職親任重故並授者鮮矣粵朕臨御嘗以是寵勁勇之臣今萬里召卿復有此拜倚信之意灼然可知惟中興以來父子兄弟出征入衛相繼不絕蓋未有如卿家之盛者勉思忠報丕昭乃父之績區：遜避非朕所期

賜王淮上表再辭免除同知樞密院事恩命不



允仍斷來章批答 八月六日

省表具之武有七德制天下之安危臣惟一心同幄中之志慮是擇爽邦之雋俾陪基命之嚴既底績于彌年盡正名于近弼卿文高學粹道廣器閱精神可以折遐衝辭氣可以消鄙倍言同乃繹謀猷推我后之嘉心逸而休功業奉爾卿之戒肆陟斗樞之亞用酬廟筭之多豈曰次遷寔為德進佇展經綸之蘊宜蠲避避之文所辭宜不允仍斷來章

賜趙雄上表再辭免除端明殿學士簽書樞密院事恩命不允仍斷來章批答 八月六日

省表具之用三傑而運帷籌高皇所以受命與數公而叅國議光武所以中興眷予樞府之庭本我兵師之柄並登英望庸協前規卿氣養大剛才全文武風采聞于天下議論屈其坐人任職攷：有愆已相公家之意告猶袞：皆竭誠強王室之言故眷知隆于一見之初而登用決于再來之際允是大任合于僉謀念成渙之遲何撓謙之太過所辭宜不允仍斷來章

淳熙四年

賜魏王愷第三表辭免荆南集慶軍節度使行江陵尹加食邑食實封恩命不允仍斷來章



批答

省表具之父子主恩固有天性至于爵賞則有義焉乃吉日甲戌揚尹節之命于廣庭公卿大夫翕然稱允者以汝四明之政卓為東諸侯之冠也免章初上嘗諭至懷于再于三斯行過矣且汝不聞有唐親王之制乎或為都督刺史或領節度使惟以屏翰王室為忠不以懇避寵章為諒也並其祇若毋過褒緣所辭宜不允仍斷來章

賜端明殿學士朝散郎簽書樞密院事趙雄上表再辭免除同知樞密院事恩命不允仍斷

來章批答 十一月七日

省表具之朕法天行健稽古凝猷和衆安民圖太寧于常武制軍詰禁倚大柄于鴻樞有嘉協贊之勞誕錫進遷之寵卿載采疆義秉心塞淵詞章擧六籍之華事業聳萬夫之望受長纓而往肯同在昔之誇辭借前箸以籌獨運當今之遠略宜仍宥容俾峻班聯當邦彛之云敷舉國人而曰稱卿雖力避朕固難從所辭宜不允仍斷來章

淳熙五年

賜奉國軍節度使殿前副都指揮使王友直上



表再辭免除殿前都指揮使恩命不允仍斷  
來章批答 二月六日

省表具之卿早臨方面久衛周廬應變無窮合孫吳之  
方略馭軍有要兼程李之寬嚴乃者閱武東郊持麾北  
面嘉甲兵之整銳知將帥之勤勞言念壯猷特加優數  
既下趣承之詔復形控免之言慷慨功名其益堅于素  
志遠巡避避勿徒守于常規所辭宜不允仍斷來章

賜朝奉大夫試給事中兼侍講錢良臣上表再  
辭免除端明殿學士簽書樞密院事恩命不  
允仍斷來章批答 六月二十四日

省表具之朕緬慕高皇肇興漢室外資信布作士氣于  
軍中內倚良平本兵謀于堂上茲簡求于人傑以參幹  
于神樞卿志節激昂風猷警邁契合殆同于天授踐揚  
久聳于民瞻宜從平奏之司並服延登之寵臣作股肱  
耳目久謂相頡視如手足腹心所期交勅毋留朕命思  
奮爾庸所辭宜不允仍斷來章

賜史浩上表再辭免除少傅保寧軍節度使充  
醴泉觀使兼侍讀加食邑食實封恩命不允

批答 十一月十七日

省表具之昔高宗命傳說首言予舊學于甘盤而說亦



復于王曰念終始典于學監于先王成憲君臣之間相告如此可謂得要道矣卿早由經術從朕儲卹再據德業釐我政事其于甘盤傳說之任固已兼之今茲懇辭機務願卽館是用升亞傳擁旄節俾進讀祖宗謨訓于清閒之燕始終典學朕心益庶幾焉遜章沓來非所望于舊德所辭宜不允

賜端明殿學士朝奉大夫簽書樞密院事錢良

臣上表再辭免除參知政事恩命不允仍斷

來章批答十一月十八日

省表具之朕御圖滋久為政益勤晝當饋以思賢夜攬

而揆事粵若泰和在唐虞成周之世亦惟聖主得稷契臯陶之臣肆依任于辰髦期濟攀于治古卿猷為肅給識慮䟽通夙推文武之才嘗著將明之效預聞兵本亶協民瞻三傑運籌既備觀于遠略四人昭德宜擢贊于繁機延登之指具孚控免之章奚再雖嘉謙牧難抑詔除所辭宜不允仍斷來章

賜王淮再上表辭免除授樞密院使大中大夫

加食邑食實封恩命不允仍斷來章批答十

一月二十二日

省表具之朕仰觀太微象緯炳著東垣為上相西垣為



上將各顯一面正天之朝事乃知祖宗以來設東西二府對司文武之柄名位同而恩禮均者豈無所自耶卿氣裕以剛慮深而敏簡廉恭敬備修身之德忠誠端亮盡事上之道徧周政路累年于茲其謀猷設施有益于我國家多矣升正使號置符公言精神折衝方佇顯績遜章數至非朕所期所辭宜不允仍斷來章

賜趙雄再上表辭免授右丞相正議大夫加食

邑食實封恩命不允仍斷來章批答 十一月

二十二日

省表具之朕觀自古命相之重莫如說命三篇若金用

汝作礪若濟用汝作舟楫若旱用汝作霖雨猶以為未也酒醴爾惟麴蘖和羹爾惟鹽梅蓋無一事不賴乎交修是以教喻如此其至也載在典冊朕甚慕之卿道德覺民忠誠致主棟梁之質可以任重權衡之信可以倚平協贊鈞樞累年于此其議論之闡偉紀律之設張皆足以成國勢之安立懦夫之志有臣如此宅揆固宜昔先正保衡俾后堯舜規模可考仁遠乎哉遜避至三其止毋再所辭宜不允仍斷來章

淳熙六年

賜武泰軍節度使開府儀同三司克萬壽觀使



曾觀上表再辭免除少保寧武軍節度使加  
食邑食實封恩命不允批答 正月十三日

表具之卿秉心有常事上盡禮不以勢權為樂而以  
間遠為安遐福修齡天方俾爾高官厚祿朕何愛焉用  
升亞保之班仍易名邦之節已敷中詔具諗外庭乃游  
控于需章殊未符于眷意雖勞謙終吉有自抑之心而  
令出惟行無可回之理並其祗若勿復重陳所辭宜不  
允

賜曾觀再上表辭免除少保寧武軍節度使充  
醴泉觀使加食邑食實封恩命不允仍斷來

章批答 正月十四日

省表具之通檀檀夏象有華孤棘之官鉅節高旌尤重將  
壇之寄孰兼徽數允屬舊人卿肅艾迪躬忠勤勵志際  
飛龍之運首濡雨露之恩施行馬于門久躡雲霄之步庸  
加顯拜益表至懷謂亟服于恩綸乃存披于遜牘尚恭  
三命毋守一謙所辭宜不允仍斷來章

賜正奉大夫右丞相趙雄再上表辭免勅令所  
修進一州一路酬賞格法了畢特轉一官依  
例加恩：命不允仍斷來章批答 正月十九日

省表具之國朝懲重內輕外之弊凡仕于郡邑者必賦



其闕閱而賞之所以使人趨事赴功說以忘勞也然地  
有遠近任有劇易則或輕或重有時而不同况歲月既  
久典籍間軼沿革隨異苟不為法以待之則予奪不公  
將如吏何此吾屢飭有司刑定章程之本意也卿以忠  
精許國道德致君粵從相予百度惟正復以餘力日與  
朕都俞一堂之上而成是書昔人所謂講若畫一者卿  
得之矣今將自僚屬至于掌故咸進厥秩並相提其要  
者也獨可已乎渙號且頒固非執謙所能格也所辭宜  
不允仍斷來章

賜通議大夫樞密院使王淮上表再辭免已進

會要經修不經進提舉官特轉一官恩命不

允批答 八月七日

省表具之朕日攬萬機粵當六閏維唐虞稽古異時存  
傳授之規模維景文養民比歲下寬仁之詔令新有銘  
盤之德戲無剪葉之書雖廣記備言悉付至公於太史  
然大綱小紀當存要覽于攸司逮閱奏篇特推信賞卿  
學該繫表知覺民先嘗贊貳于政塗實提于儒館肆  
班新渥式獎舊勞紀建元之修 備昭于前事行正  
觀之仁義方屬任于鴻儒所期臣主之俱榮何愧階封  
之並授所辭宜不允



獎諭臣僚詔

獎諭鎮江府駐劄御前諸軍都統制成閔將本  
 軍不曾銷落繳納批鑿隱匿付身共九千八  
 百六十件繳申三省樞密院乞行毀抹詔 乾  
 道六年八月十七日

孝宣之核名實漢治乃興子木之數甲兵楚師遂振孰  
 推朕意繫我將臣卿自總戎昭力修軍政馭下絕厘毫  
 之隱事君懷忠赤之誠上虛籍于司勳何止一通之告  
 第戰多于幕府奚憂六級之差省閱以還歎嘉無斃其  
 繳到付身並令承旨司焚毀故茲詔示想宜知悉

獎諭御前諸軍都統制利州路安撫使知興元

府吳拱詔

乾道七年五月十三日

勅吳拱省四川宣撫司奏卿發卒助修興元府渠堰宣  
 力最多事歲有豐凶在天時而難必地無肥瘠顧人力  
 之何如惟水利之能修則金穰之可望乃眷西南之境  
 昔稱下上之田繫爾先臣暨而叔父皆以經武整軍之  
 暇不忘務農重穀之心卿既踐世官仍遵家法率萬兵  
 而省徭役繕六堰而固隄防穿鄭白之渠在今奚愧通  
 褒斜之漕易彼徒勞閱奏載嘉注懷彌厚

獎諭右通議大夫充敷文閣待制提舉江州太



平興國宮張運就饒州以私家米穀助賑濟  
詔 九月二十一日

往在漢朝西河歲惡齊相雅行躬耕率齊人入粟武帝  
既尊顯之以風百姓史官復贊其質直有榮耀焉今楚  
東年不順成振廩勸分平徭簡賦苟利吾民朕無毫髮  
勒也卿以甘泉舊老篤鄉隣之誼傾私室之藏體國愛  
人輕利重施視先民益無愧矣使者以聞朕甚嘉之故  
茲獎諭想宜知悉

獎諭昭慶軍節度使知太平州楊侯詔 淳熙五

年五月四日

勅揚侯省三省進呈卿劄子勸諭三縣食利人戶增築  
管下私圩畢工乞將圩內淳熙五年夏稅上供正緡一  
半本州自行抱認起發事古者町原防規偃緒然後可  
以稼下地今大江以東其穀宜穡劬農闢野不在良二  
千石乎卿以樞機近臣出鎮姑熟躬行阡陌勞民不怠  
既督治私田以興其利又代輸公賦以報其力使千里  
之間有豐稔之望無水旱之虞厥庸茂焉何愛筆書不  
以為循吏之勸故茲獎諭想宜知悉

賜臣僚生日詔

乾道六年



賜皇兄檢校少保岳陽軍節度使開府儀同三司克萬壽觀使永陽郡王居廣生日詔 八月二十日

勅居廣律清南呂氣肅西方乃眷吳王載臨初度維籟牽之厚維醪醴之嘉和樂且湛朕方推周室之燕熾昌而壽爾尚協魯侯之詩

賜尚書右僕射虞允文生日詔 十一月二日

勅允文嶽降神而生申歲復攝提之正帝賚弼而夢說星占台斗之明亶為王國之華蓋侈家庭之慶肆放臺餽用協邦彛其茂介于修齡以永毗于元化

乾道七年

賜叅知政事梁克家生日詔 二月三日

勅克家律琯分春望舒朏夕是生雋輔來翊丕基亨飴有常姑致養賢之意熾昌無斁尚符壽母之言祇服眷私勉殫忠蓋

賜皇子雄武保寧軍節度使開府儀同三司判

寧國府魏王愷生日詔 四月二十四日

應恢台于孟夏載誕賢王加慶錫于諸侯適符令旦維暫遙于親膝宜特舉于邦儀 茂恩華益綏壽祉

賜太尉保信軍節度使克萬壽觀使鄭藻生日



詔 四月十五日

月盈首夏祥集高閣是生外戚之良光被累朝之眷屬  
門弧之紀旦申臺餽以示恩往續壽祺永承禮遇

賜皇叔祖檢校少保昭化軍節度使開府儀同

三司嗣濮王士輅生日詔 七月

勅士輅日在畢中弧垂戶左生吾宗室之老時乃邦家  
之光視吉履之有祥知秀眉之無害宜豐養子用助燕  
私

乾道八年

賜太尉昭信軍節度使提舉皇城司曹勛生日

詔 正月二日

勅曹勛有倣華年惟時翼日會春郊之和氣鍾尉府之  
舊臣人推謙懿以禔身天錫壽祺而難老豐予賜式燕  
爾家庭

賜叅知政事梁克家生日詔

勅克家歲臨協洽律中夾鍾符君臣慶會之期得天地  
中和之氣繼廩人之粟既示寵于誕祥嘗君賜之羹復  
增光于榮養益綏壽嘏永輔明昌

淳熙二年

賜叅知政事李彥穎生日詔 十二月十四日



勅彥穎商正建丑周嶽生申蔚然邦國之英籍甚廟堂  
之譽四人迪祿誕將丕冒之威三壽作朋昏俾熾昌之  
祉茂膺蕃錫永弼宏基

淳熙三年

賜皇子魏王愷生日詔

勅愷秀萼紀月屬誕慶于賢王瑞麥登農兆豐年于樂  
土雖阻君親之奉諒均民庶之懽馳遣近璫往將厚賜  
尚永千齡之錫茂膺多福之綏今遣入內侍省內侍  
高品趙友聞齎賜卿生日羊酒米麩等具如別錄至可  
領也故茲詔示想宜知悉夏熟卿比平安好遣書指不

多及

賜使相鄭藻生日詔

勅鄭藻斗杓建巳當既望之良辰神嶽生申際復平之  
盛旦儼衮衣而在列冠戚畹以增華逮茲初度之臨寵  
以上台之賜永綏壽嘏庸對眷懷

賜簽書樞密院事王淮生日詔

六月七日

勅王淮天生哲輔臨季夏之良辰家有慈親慶仁人之  
多壽豈特廟堂之盛抑為邦國之華故賜式于禁中侑  
宴觴于膝下永膺難老共贊昌圖

賜開府儀同三司克萬壽觀使曾覲生日詔 八



月十三日

勅曾觀清秋幾半素魄將圓鍾爽氣于高閣誕貴臣于  
令旦申加飲抑有舊章其茂介于壽齡以永承于恩  
遇

賜叅知政事龔茂良生日詔

八月二十二日

勅茂良月正仲秋適會壽星之次天生名輔載垂大昴  
之芒紀初度于蓬弧繼多儀于庖廩永臻難老協濟多  
盤

賜少保永陽郡王居廣生日詔

秋序中分日旬再浹弧矢記設門之慶豆籩資飲飲之

歡以增孤棘之華以侈燕棠之盛益綏壽祉庸壯宗盟

賜叅知政事李彥穎生日詔

勅彥穎季冬今月幾望良辰紀蓬弧始負之祥凜松栢  
後凋之操特豐賜式加寵輔臣尚綏壽考之祺永贊明  
昌之運

淳熙四年

賜使相鄭藻生日詔

勅鄭藻景風時至皓月宵圓會此清和鍾于耆艾聯榮  
戚晚蚤逢極盛之朝視秩台司今際中興之運載臨誕  
日寵錫多儀尚永保于千齡庸增光于四姓



賜同知樞密院事王淮生日詔

勅王淮溫風倣至化日彌長鍾英傑于金華贊明昌于火德君庖繼肉與臺餽之彛章親膝稱觴昭樞庭之榮事尚綏壽嘏永對眷懷

賜簽樞趙雄生日詔 七月七日

勅趙雄高颺初授辰火微流儲英氣于一賢應嘉祥于七夕馳盼宇醴往佐豆觴永綏壽考之祺式佇功名之會

賜皇叔祖少傅昭化軍節度使判大宗正事嗣濮王士輅生日詔

勅士輅維吾族老爵齒甚尊眷乃誕期餼牽宜厚屬秋光之漸爽諒夕燕之多歡往醕壽觴益綏純嘏

賜皇兄少保岳陽軍節度使克萬壽觀使永陽郡王居廣生日詔

勅居廣若稽本朝加禮近屬記其誕日錫以多儀矧是宗英貴隆王爵餼牽有踐酒醴維豐昭予異恩介爾多壽

賜皇太子生日詔 九月四日

勅某月臨無射節適重陽維時主器之良載值吹銅之旦近稽唐制賜仁孝之六章遠繼魯詩賜熾昌之千歲



欽承飲賜茂對慈懷

賜少保觀文殿大學士克醴泉觀使侍讀永國

公史浩生日詔 九月六日

勅史浩肅霜紀月駿岳炳靈是生名儒嘗翊初政召陪  
經幄日告辰猷會初度之載臨舉多儀而申錫願言豐  
沛之舊誕保喬松之年

賜叅知政事李彥穎生日詔

勅彥穎卿三年輔政一節匪躬當此歲寒紀其誕慶壽  
祺之祝家國所同往致恩敬用茲燕飲

淳熙五年

賜太尉威武軍節度使提舉萬壽觀李顯忠生

日詔 五月十四日

勅顯忠夏序正中月華幾望是生名將嘗著戰功因弧  
矢之初辰加籙牽之厚禮欽承眷寵益介壽祺

賜叅知政事范成大生日詔 六月四日

勅成大考律林鍾炳靈雋輔當延登之有倣念載誕之  
斯臨錫以籙牽貳之醪醴將予厚意介爾修齡

賜樞密王淮生日詔

勅王淮日臨鷄火柄斡鴻樞叶和氣充閭紀鄭伯驚姜之  
旦多儀列庶增魯戾壽母之榮尚緝休祥益光圖任



賜叅知政事趙雄生日詔

勳  
勅趙雄律啟三秋奠敷七葉聚星辰之秀氣生柱石之良臣爰舉賜常用增家慶尚保期頤之壽迄成弼亮之

賜士輅生日詔

天佑帝室時生宗英嗣有濮之舊封董諸姬之同姓茲臨誕日是錫多儀已登衛武之年更俾魯僖之壽

賜曾觀生日詔

日月合于壽星毅律諧于南呂惟時雋老載紀誕期錫以醪醴之豐貳以餼牽之厚益綏多祉茂對隆恩

賜皇太子生日詔

氣清秋律秀毓春宮茲逢載誕之辰爰舉匪頒之式餼牽維厚醪醴維豐尚祇服於寵光以永綏于壽祉

賜少保右丞相史浩生日詔

肅霜應候近重九之佳辰大昴垂精符半千之昌運推君庖之飲賜侑相府之初筵益永壽齡茂毗皇化

淳熙六年

賜保信軍節度使開府儀同三司克萬壽觀使

鄭藻生日詔

律旋仲呂月滿良宵嘉予耆艾之臣生此清和之候欲



增光于外戚爰加賜于上台益介壽祺永綏寵祿

賜樞密使王淮生日詔

鍾律聚和星輝孕粹載紀左弧之旦允嘉右府之勞馳  
賚縟儀增光綵侍尚俾壽祺之介永為家國之榮

賜右丞相趙雄生日詔

秋律肇清坤維鍾秀是生賢相來翊昌期君臣之遇方  
隆弧矢之辰載紀祇膺寵賚益永壽齡

賜皇叔祖士輅生日詔

卿屬近行尊年高德劭茲紀孟秋之月是臨載育之期  
頌籟牽酒醴之豐侑鐘鼓管絃之樂欽承眷與益保壽

減

賜叅知政事錢良臣生日詔 十一月三日

朕簡求邦俊贊貳國均眷言六射之初適在三冬之仲  
厚加放賚助洽燕私往膺壽豈之祥永對明昌之運

玉堂類稿卷第十 終



王堂類稿卷第十一

周益文忠公集一百十一

賜南平占城勅書

賜南平王李天祚郊祀加恩制誥勅書乾道六年

勅南平王李天祚朕順迎至景祇歎圓立乃眷南邦夙  
 虔內貢撫封雖遠推惠不遐寵以綸言申之賜式往膺  
 廷渙庸對神釐今賜御馬二疋金鍍銀作子鞍轡一副  
 纓紋全衣一襲紫羅夾公裳一領熟白小綾寬汗衫一  
 領熟白小綾勒帛一條熟白大綾寬夾袴一腰紅羅夾  
 繡三襜一條抱肚一條二十五兩金御仙花腰帶一條  
 五十兩白成銀腰帶匣一具金花銀一百兩鈔鑼二面



衣着細衣着共雜色絹二百疋綠絹四十三疋赤黃絹二十三疋疋緋絹三十疋淺色絹三十二疋碧絹二十二疋槐黃絹二十六疋粉紅絹二十四疋至可領也故茲云諭想宜知悉春寒卿比平安好遣書指不多及

賜南平王李天祚乾道八年曆日勅書 乾道七年

年八月

勅南平王李天祚堯重南交曆星辰而申命禹臨四海暨敬教以成功菲涼雖愧于前猷正朔當頒于遠服其成密度用洽同文今賜卿乾道八年曆日一卷可領也故茲示諭想宜知悉秋涼卿比好否遣書指不多及

賜安南國王嗣子李龍翰淳熙四年曆日勅書  
勅安南國王嗣子李龍翰齊王衡之政每欽授于人時撫銅柱之封嘉恪遵于戾度茲預頒于正朔俾祇迪于王春堅而拱北之心廣我暨南之教今賜卿淳熙四年曆日一卷至可領也故茲示諭想宜知悉秋涼卿比好否遣書指不多及

故安南國王李天祚上遺表及遺進方物賜其

子龍翰撫諭勅書 淳熙四年

勅安南國王李龍翰省廣南西路經略安撫司繳奉卿父所上遺表及遺進方物事眷惟爾考父奠南郊方錫



異恩進邦昨土奄聞淪謝良用盡傷卿肇襲世封恪遵  
先志使紹及境遺物來庭克孝而忠不忘嘉嘆今令經  
略安撫司回錫錢帛至可領也故茲撫諭想宜知悉春暄  
卿比好否遣書指不多及

賜李龍翰封安南國王制誥勅書 四月

勅安南國王李龍翰朕稽若舊章誕揚新命大啟爾宇  
嗣長乃師制綉甚華恩頌惟腆尚欽寵數益固封陟今  
賜卿馬二疋金鍍銀作子鞍轡一副纓紋金紫潤羅夾  
公服一領小綾寬汗衫一領勒帛一條熟白線綾寬夾  
袴一腰紅羅軟繡夾三襜一條抱肚一條二十五兩金

御仙花腰帶一條五十兩白成銀腰帶匣一具金花銀  
一百兩數鈔鑼二面衣著雜色絹二百疋至可領也故  
茲示諭想宜知悉春暄卿比好否遣書指不多及

賜安南國王李龍翰淳熙五年曆日勅書

勅安南國王李龍翰朕仰稽天度俯授民時遐念藩維  
夙同正朔雖未興于副歲其預下于新書尚俾海隅永  
陶王化

賜安南國王李龍翰淳熙六年曆日勅書 八月

二十一日

朕參稽堯曆祇叙禹功正朔所頒適遐靡間眷言藩服



世篤忠誠宜錫新書用興嗣歲尚體授時之意益肩拱極之心

賜安南國王李龍翰淳熙七年曆日勅書 八月

二十五日

朕欽崇天道恪授人時嘉與多方共興嗣歲眷言南服夙奉中朝是遵頒朔之文用懋守藩之績祇予德意厚乃民生

賜占城嗣國王鄒亞娜進奉勅書 淳熙三年三

勅占城嗣國王鄒亞娜昨據提舉福建路市舶張堅繳奏卿所遣進奉使副揚卜薩達麻翁卑頓等賫到表章

一通并貢象牙乳香沉香等事維乃海邦舊遵國制口速而纂服繼述不忘仍歲以來使航游至旅陳方貢祇慶如

裡載念勤誠良深眷矚已降指揮將所貢物以十分為率許留一分其餘依條例抽買給還價錢外今回賜卿錦三十足生綾二十足川生押羅二十足生桴蒲綾二十足川生克絲二十足雜色綾一百五十足雜色羅一百五十足熟白桴蒲綾五十足江南絹五百足銀一千兩至可領也故茲示諭想宜知悉春暖卿比好否遣書指不多及

賜外任臣僚夏臘藥勅書



淳熙二年

賜皇子判明州魏王愷金合臘藥勅書 金合重

一百兩

勅愷歲當窮臘時正泣寒言念賢王方臨海服錫之珍  
劑副以寶匱體我眷懷資而冲攝

賜前宰相福建路安撫使陳俊卿銀合臘藥勅

書 銀合重一百兩

勅俊卿時屬隆冬氣凝寒律有懷舊相復鎮故鄉民譽  
既昭朕心所眷馳頌良劑勉奮冲襟

賜前執政江南東路安撫使劉珙銀合臘藥勅

書

勅劉珙卿坐司留齋行易歲陰眷烏帷幄之臣履此冰  
霜之候特頒飲劑往輔冲和

賜前執政荆湖北路安撫使楊俟銀合臘藥勅

書

勅楊俟卿位重節旄任隆藩閫屬嚴凝之履序想綏撫  
以注懷寵以頒宣助其服食

賜四川安撫制置使范成大銀合臘藥勅書 銀

合重五十兩

勅成大卿負嚴徐之望鎮梁益之郊適臨栗烈之辰遐



念中和之政宜推珍錫用助寶調

賜侍衛馬軍都虞侯王明并御前都軍都統制

吳挺郭剛皇甫侗魯安仁郭鈞李川郭棣御

前諸軍副都統馮湛韓寶張榮張宣于友明

椿銀合臘藥勅書內吳挺用御合重五十兩餘用汝合重三十兩

勅王明汝內懷忠槩外摠戎昭屬寒律之方凝軫眷懷

而良厚宜頒靈劑用助珍調

淳熙三年

賜皇子判明州魏王愷金合夏藥勅書

勅愷表海名邦近畿重地嘉予賢子久領藩符時屬炎

蒸諒勤綏撫往頒良劑尚體慈懷令差入內侍省內

侍高品幹辦萬壽觀監通進司朱司政賚賜卿金合夏

藥至可領也故茲示諭想宜知悉

賜福建路安撫使陳俊卿

勅俊卿朕以炎曦在候扇暍存心言念相臣遠填卿部

特頒靈劑昭示至懷穆如清風慰彼黎庶今賜卿銀合

夏藥至可領也故茲示諭想宜知悉

賜江東路安撫使劉珙

勅劉珙卿以樞近之臣茂居留之績屬茲瘴暑念乃勤

勞特分尚藥之珍往致衛生之助



賜湖北安撫使楊傑知鎮江府沈復  
詞並同前祇改居留二字作藩宣

賜權四川制置使范成大

勅成大卿名在西清寄深全蜀雖喜雪山之重豈忘薰  
殿之涼實珍劑于上匪侈異恩于中宸尚均此施加惠  
彼民

賜侍衛馬軍都虞侯王明并御前諸軍都統制

郭棣郭剛魯安仁皇甫倜李川郭鈞副統制

韓寶劉沂明椿于友馮湛張宣

勅王明郭棣等汝膺時遴選總我成師候屬炎猷恩頌

名劑尚推君賜普慰士心

賜吳挺

勅吳挺卿選由世將往扞邊陲履九夏之炎蒸撫三軍  
而勤勩馳盼芝檢遠致藥囊推予乃眷之心勞爾所臨  
之士今賜卿銀合夏藥至可領也其軍中夏藥可依年  
例令近上統制官分賜仍傳宣撫問故茲示諭云

賜皇子判明州魏王愷

勅愷元冥紀律冰雪方友言念賢王鎮臨海國分頒良  
藥以禦凝寒深體眷懷益加冲揖今差入內侍省內  
侍黃門梁暉賁賜卿金合臘藥至可領也故茲示諭想



宜知悉冬寒卿比好否遣書指不多及

賜前宰相福建路安撫使陳俊卿

勅俊卿臘寒律烈冬澤服堅吐故納新雖保冲和之守

順時致養亦資湯液之功寶珍劑于寶奩寵輔臣于帥

閫

前執政官知建康府江東安撫使劉珙知荆南

府湖北安撫使王炎 並同前詞

賜敷文閣待制四川安撫制置使范成大

勅成大嚴凝之氣始于西南遐念名臣方分閫寄馳盼

藥石用輔保願尚體朕恩併蠲民瘼

賜前執政知鎮江府沈夏知泉州姚憲知太平

州楊倓 並同詞楊倓但改名郡

勅沈夏季冬之月天氣沍寒按錄桐君裁成錦劑眷言

名鎮方倚舊人特厚恩頒用資冲攝

賜吳拱

勅吳拱言從行闕往戍別都風颺凜然征馭勞止隨頒

藥石用輔節宣其廣朕恩以綏爾眾

賜御前諸軍都統制吳挺郭剛李川皇甫侗郭

棣郭鈞魯安仁御前諸軍副都統韓寶明椿

張宣于友王世雄馮湛



朕深居九重未嘗一念不在將士而况固陰沍寒屯戍  
勞止分頒藥石以致予恩尚悉乃心撫循所部

淳熙四年

賜皇子判明州魏王愷

冬陰合沓海氣茫洋乃眷親賢久勤牧御製為珍劑實  
以寶奩昭示慈懷往資冲抃今差入內侍省東頭供  
奉官幹辦景靈宮賈惟清賞賜云云

賜江南東路安撫使劉珙

卿夙儀近弼久鎮陪都邦倚滋隆民謠載洽錫之珍劑  
禦此凝寒善加保順庸副傾囑

賜荆南北路安撫使姚憲

卿言從閩會易鎮荆都冰霜凜冽之交川陸馳驅之久  
特頒藥石往輔冲和民瘼有瘳朕心乃懌

賜成都潼川府夔州利州路安撫制置使胡元  
楨

卿親被選掄往勤牧御已峽凌寒之際錦城席煖之時  
衆藥實匱九芝塗檢助爾保調之術昭我眷倚之懷

賜侍衛馬軍行司武康軍節度使侍衛馬軍都  
指揮使吳拱御前諸軍都統制吳挺郭剛郭  
棣郭鈞皇甫侗李川于友魯安仁御前諸軍



副都統岳建壽李思齊王世雄韓寶  
朕高居嶼館深念轅門冒此嚴凝勤于閱習宜頒珍劑  
用示眷懷推我惠心徧爾部曲

賜知太平州楊倓福建路安撫使沈復

卿夙聯樞近外寄藩維屬此沍寒勤于宣化分頒良劑  
昭示至懷民瘼有瘳朕心則懌

賜武經大夫榮州刺史差克池州駐劄御前諸

軍都統制明椿

汝甫膺隆委移戎池陽屬此凜冬軫予眷想寶奩珍劑  
特致恩頒尚克欽承勉圖報稱

淳熙五年

賜皇子判明州魏王愷金合夏藥

賜成都潼川府夔州路安撫制置使胡元質

有赫炎威厥惟盛夏眷言全蜀煩我近臣珍劑寔奩往  
資冲攝欽承至意善撫遠民

賜知太平州楊倓

有赫炎蒸厥惟盛夏言念樞廷之舊爰分名壤之麾特  
厚恩章往頒藥石尚欽予命益勉民庸


賜侍衛馬軍行司侍衛馬軍都指揮使吳拱并

御前諸軍都統制吳挺郭棣郭剛皇甫侗李



川田世卿子友御前諸軍副都統制韓寶王  
世雄明椿岳建壽李思齊

朕身居高明心念將士時當炎律諒劇煩蒸宜有頒宣  
用資保攝尚今部曲咸識眷存今賜卿等銀合夏藥并  
統制統領將佐官屬等並依年例分賜仍傳宣撫問故  
茲示諭想宜知悉夏熟卿等各



示諭除節鎮勅書 布政榜附

示諭安德軍官吏軍民僧道耆壽等勅書 淳熙三年二月

勅安德軍官吏軍民僧道耆壽等朕以伯圭擢秀天支  
流徽邦族剖符持橐既備著于多庸植蠹建牙宜時開  
于巨屏以示展親之意以凝疆幹之勳聞孚號之夾揚



諒周邦之咸喜已除伯圭安德軍節度使云云故茲示諭想宜知悉

示諭荆南官吏軍民僧道耆壽勅書淳熙四年四月

勅云以愷恩隆帝于貴極王封父分鄣水之符入奉甘泉之計易將壇之舊組加尹伯之新名乃眷荆郊素為樂土聞親賢之遙鎮諒民吏之均懽

皇子愷布政榜

皇子荆南集慶軍節度使行江陵尹 應荆南管內官吏僧道百姓等茲者述職明庭拜恩宸宸更兩鎮節旄之寄視累朝師尹之儀戴寵渥之便蕃省孱庸

而兢惕雖虎符載剖尚臨東浙之吏民然鷄尾遙瞻想見南荆之父老鴻惟上聖眷是名藩常遴擇于官僚俾交修于職業維時文武之房彥暨乃緇黃之流屯戍連營耆厖居里各欽承于休德毋自蹈于非彝坐令文王好善之民馴致堯帝可封之屋諸有尊屬並存問之

示諭保寧軍官吏軍民僧道耆壽等勅書淳熙

五年十月

朕以史浩懇辭鼎路留侍經帷升班聯于三少之中領節制于九年之後諒樂郊之有眾聞舊德之載臨罔不



欣愉知吾眷頌

示諭寧武軍勅書 六年正月十三日

朕以曾觀蚤從代却久侍漢祠特升左棘之班改附西州之節瞻言樂土實遠行都聞耆舊之遙臨想旄倪之眷悅

天申慶會節賜香并齋筵酒果口宣

乾道六年

賜皇子慶王恭王滿散會慶節道場乳香內侍來敬有勅良月載臨永年獻祝詠彼人天之眾符而忠孝之心宜錫寶薰共成慶會

賜三省官滿散會慶節道場乳香 內侍徐爾

有勅春時宰輔率乃官僚祝予壽祉之增灼見忠誠之志宜均馥郁用助薰修

賜樞密院官 內侍韓世榮

千秋紀節萬壽祈年乃眷樞臣恪修佛供助爾普薰之願力均予騰馥于軍民

賜殿前司 內侍何弼

卿祇扈殿嚴肅提禁旅慶流虹之紀瑞即靈鷲以輸忠宜寵賚于三薰助祝筵于萬壽

賜馬軍司



卿職總羽林節逢飛電籲眾心于茲日祝萬壽于我躬  
是錫奇芬共成勝事

賜步軍司 內侍徐稱

卿密總衛兵欣臨誕序共輸臣節仰祝帝齡寶馨特出  
于尚方妙果庶成于梵刹

乾道七年

賜皇太子 內侍何弼  
天申節

時當日永節紀天申喜我儲闈恭祈聖壽宜致薰修之  
助共成勝妙之緣

賜馬軍司 內侍楊祐  
天申節

天其申命用休載逢誕節臣能歸美以報共祝修齡宜  
加錫于寶薰俾助成于勝事

賜步軍司 天申節  
內侍韓世榮

月臨仲夏節應千秋眷時宿衛之臣祝我聖神之壽宜  
均用獎勤誠

淳熙二年

賜皇太子 內侍陸彥端  
會慶節

律正孟冬祥開誕序嘉乃前星之助祝我後天之期往  
炷寶薰用光金地

賜三省官 內侍陸彥端



陽月屆期紀殊祥于虹渚柄臣率屬演密義于鷲峯有  
嘉萬壽之祈宜厚三薰之錫

賜樞密院官

內侍張思溫

眷乃樞臣慶予誕節申祝南山之壽備繙西竺之書往  
續鑪烟助成法會

賜殿前司

同前

嘉予環尹率乃偏裨因彌月之昌期伸永年之善頌其  
頌名馥以助普薰

賜馬軍司

誕月發祥普天獻祝嘉虎臣之歸美即鹿苑以輔誠凝

此異薰助其勝事

賜步軍司

內侍李琪

延長之祝備慶于祇園戒定之香特頌于御府庶吾禁  
旅同此福緣

淳熙四年

賜皇太子

高思聰

誕節將臨儲明載懌款三清之秘宇祝我修齡賜百和  
之奇芬將予厚意冀成勝妙同介祺祥

賜三省官

李琪

誕節屆期普天獻祝受臣隣之歸美叩仙佛之斲年馳



錫名薰助成勝事

賜樞密院官 宋暎

眷予樞輔欣際誕辰言超蓂莢之林申祝松椿之筭豈  
無錫予用助薰修

賜殿前司 同前

震夙之晨華夷同慶眷言環尹請祝壽齡分海國之清  
芬助精廬之勝會

賜馬軍司 何弼

時逢誕節歡動轅門共伸萬壽之祈既歷三旬之久宜  
頒馨烈用助勤誠

賜步軍司 李琪

惟時良將志切愛君及此誕辰祈予壽祉宜分寶炷共  
結勝緣

淳熙五年

賜皇太子 何弼 天申節

天申令旦家國同歡乃眷元良預伸頌禱逮成勝事宜  
助普薰

賜三省官 天申節

卿等欣逢誕慶請祝永年大集寶坊具嚴勝會宜推珍  
錫用續清芬



賜樞密院官

陸彥端

天申節

卿長我幾廷贊予孝治茲臨誕節請祝慈齡馳錫奇芬助成淨供

賜殿前司

高思聰

天申節

月紀誕賓時逢誕慶有嘉環尹祝我親齡宜錫爐薰共成法供

賜馬軍司滿散

宋映

天申節

若時將臣言率其旅共趨勝地仰祝慈齡錫以寶薰助其忠悃

賜步軍司

李琪

天申節

炎曦方永誕節載臨乃眷虎臣祝吾親壽宜分寶炷共結勝因

賜三省官赴齋筵酒果

有勅堯封祝壽已罄精誠周雅肆筵宜均多福欲資稟愷更錫旨甘

賜樞密院官赴齋筵酒果

內侍陸彥端

有勅卿等罄乃誠心祝吾親壽既成法會方啓燕觴宜有分頒用昭眷寵

玉堂類稿卷第十一 終



玉堂類稿卷第十二

周益文忠公集一百十二

賜臣僚到闕茶藥口宣

乾道六年

撫問端明殿學士新知信州洪遵到闕并賜銀

合茶藥 八月

有勅卿起臨近郡入奏便朝念遠涉于川塗盍分盼于

茗劑式宣恩指尚體眷私 內侍韓世榮

撫問新知紹興府蔣芾到闕并賜銀合茶藥 十

月十一日

有勅卿甫御祥琴即分帥越趣修過闕之觀載念道塗



之勞宜錫珍良用昭眷待 內侍麥敬

撫問恩平郡王璩到闕并賜銀合茶藥 十一日

有勅卿聞講 儀請修觀禮遠屬風霜之凜有懷涉履

之勞往致恩頌用彰友愛 內侍王公昌

撫問新知平江府魏杞到闕并賜銀合茶藥 十

二月三日

有勅朕眷懷舊相擢鎮近藩遙驅將及于郊畿廷勞特  
馳于使驛仍厚珍良之錫用資輔養之方 內侍符永思

乾道七年

撫問賀金國生辰使副趙雄等到闕賜銀合茶

藥 四月十四日

有勅卿等肅持使節遠聘隣疆久驅北道之車善喜返南  
轅之旆馳頌茗劑昭示眷懷

撫問皇子魏王愷到闕并賜金合茶藥 五月

鎮宣城千里之地曾未淹時奉德壽萬年之觴爰初請  
覲念載驅于暑路特加錫于寶匱 內侍謝安道

撫問端明殿學士新知建康府洪遵到闕賜銀

合茶藥 六月

卿就更留鑰祗覲宸廷念暑路之再馳軫眷懷而良厚  
宜加頒賚用輔保調 內侍陸彥端



乾道八年

撫問賀金國正旦使副莫濛孫顯祖到闕并賜

銀合茶藥 內侍韓世榮

卿等咸膺遴選遠聘殊隣茲成禮以言歸嘉導塗之良  
勸馳頒茗劑徃勞駮駢

淳熙三年

撫問賜吳挺到闕銀合茶藥 四月

卿遠超嚴召甫及近郊載惟冒涉之勞良軫眷懷之厚  
欲資冲嗇爰有寵頒

撫問賀金國正旦使副謝廓然等到闕并賜銀

合茶藥 內侍韓世榮

春律既中陽和有做言念皇華之使遠勤四牡之歸思  
浣朔塵是推賜式

撫問賀金國生辰使副張宗元等到闕并賜銀

合茶藥 內侍張思温

卿等自春涉夏由北而南有嘉跋履之勤有負光華之  
遣宜加獎勞用表眷知

淳熙五年

撫問賀金國正旦使副錢良臣等到闕并賜銀

合茶藥 二月十二日  
內侍李琪



卿等肅將朝命遠聘朔庭茲訖事以言歸想遵塗之良  
勸迎加寵勞仍有分頒

撫問吳挺到闕并賜銀合茶藥

六月二十日  
內侍高思聰

卿遠祗嚴召入觀行都當盛夏之炎蒸念修塗之勞勸  
迎加勞問昭示眷存

淳熙六年

撫問恩平郡王璩到闕并賜銀合茶藥

八月八

日  
內侍宋暎

卿侍祠重屋利涉濤江喜開一節之超將遂三年之見  
迎頒茗劑助保冲和

淳熙七年

撫問新知明州范成大到闕并賜銀合茶藥

朕緬懷舊德起表東藩喜舟御之過征即都門而廷勞  
仍加頒賚用示眷存

三月四日  
內侍李琪

賜臣僚告口宣

乾道六年

賜皇子愷郊祀大禮畢加食邑食實封告

有勅甘泉蒞祀既底禮成宣室均釐當由近始祗服綸  
言之寵益勤子職之修

賜皇弟璩



并况之休徧于中外益封之寵及我親賢其祇服于命書以永綏于帝祉

賜皇兄居廣

朕拜况熙壇均釐近族厚甚土田之錫粲然綸綍之華式克欽承力圖報稱

賜鄭蒸

朕拜况胤壇推恩戚畹歸示均釐之意亦疇執事之庸祇服寵光永綏戩穀

賜劉懋

眷言妃族久即里居茲由邦賚之行加厚邑租之賜其

膺寵渥益介壽祺

賜成閔

朕受釐穹壤均福適遐眷言分閭之臣阻預侍祠之列特加邑賦往服命書

賜蒲察乂安

禮神頌祇甫竣元祀加地進律用賚多庸字號有光承恩無斁

賜李顯忠主管侍衛馬軍司公事告 十一月

有勅卿早蘊竒謀今為宿將總天營之萬騎衛禁陞之九重服我綸言勉而忠槩



乾道七年

賜虞允文慶壽加尊號轉官告

有勅榮名盛禮既並奉于尊親高爵崇階宜特加于輔  
相其祗綸命以對邦休

賜李顯忠特復太尉告

六月

有勅乃眷虎臣素推忠槩茲還鵠印增壯戎容其祗服  
于命書以勉圖于報禮

賜王炎除樞密使依舊四川宣撫使告

七月

有勅朕眷懷元老擢冠本兵雖遙帷幄之咨實厚股肱  
之體欽承恩詔益勉忠圖

淳熙二年

賜史浩遇太上皇帝慶七十加食邑食實封告

有勅禮成東內慶浹多方眷惟舊德之良錫以新恩之  
厚往祗詔綽茂對王休

賜鄭藜

稱壽親庭推恩晚戚特啟封于樂國仍衍食于腴田往  
錫制函庸切邦庸

賜曾覲

卿感會風雲參聯袞繡值萬年之慶禮廣多戶之腴田  
欽帥訓辭肅承恩渥



賜楊倓

卿入陪樞省出殿帥垣邦有榮懷恩加采邑往祗承于予命思奮勵于乃猷

賜吳挺

朕輯古禮文慶親壽嘏眷秉旄之宿將方抵觀于斯朝迎授詔函欽承邦渙

賜皇弟居中

朕奉冊寶之華慶庭闈之壽宜推邦渙用侈宗盥往其肅承體我敦睦

賜劉懋

朕肇舉慶儀溥施惠澤眷言耆舊久遠燕閒申加邑戶之多亟服絲綸之寵

賜趙伯圭除節度使告

二月

卿蔚以宗英孚于眾望俾遙臨于節鎮庸夾輔于京師欽率訓辭益畜報禮

賜趙伯圭除開府儀同三司告

九月

恩昇碧幢夙隆異數禮均黃閣益峻徽章往承錫命之優思稱展親之厚

淳熙三年

賜吳拱除侍衛馬軍都指揮使告

十一月十四日



卿勇冠三軍勲高載世擢提騎旅增壯戎容往服訓言  
益圖報稱

賜曾觀郊祀加恩告

有勅朕竭誠忘祀拜况高穹眷代卹之者英陪漢壇之  
陟恪式頒綸命往服恩腴

淳熙四年

賜皇子魏王愷除荆南集慶軍節度使行江陵

尹告 四月五日

尹正之權國朝所重欲增華于節鉞肆加寵于親賢往  
祇綸綍之言益壯藩維之勢

淳熙五年

賜王友直除殿前都指揮使告 二月十八日

卿久貳殿巖備宣乃力茲頒綸命益正其名祇服恩徽  
勉圖忠報

賜皇子魏王愷除永興成德軍節度使雍州牧

告 閏六月十三日

疇庸節水建牧咸陽仍更齋鉞之雄用作藩符之寵欽  
承綸命益聳民瞻

賜吳挺除利州西路安撫使兼知興州告

卿載馳十乘入覲九重遠分置于帥藩遂就頒于綸命



欽承異寵往奮顯庸

賜史浩玉牒所進書加恩告 十月二十三日

總率諸儒裁成鉅典肆衍爰田之賦用增台路之華茲錫明綸尚欽異數

賜史浩除少傅告 十一月十四日

避寵釣衡高風可尚兼官得相明制斯頒其即欽承以符眷注

淳熙六年

賜曾覲授少保告 正月十日

卿為時耆俊荷國寵榮越升孤保之崇併易將旄之重

其承綸命以副朕心

賜王淮秘書省進書加恩告 八月十一日

書成冊府階進樞廷酬典領之舊勞示弼諧之厚禮其承綸命以闡儒猷

賜臣僚批答口宣

乾道六年

賜右僕射虞允文辭免勅局進書轉官加恩不

允批答 十月三十日

明刑弼教既覽成書重賞眡功宜加峻秩奚為固避往即欽承



賜皇子慶王愷辭免郊祀加恩不允批答 十二

月十二日

比均帝社首及嗣賢亦既告廷豈容反汗其趣成于漢命毋重刺于遜章

賜再上表辭免不允仍斷來章批答 十三日

祭受其福方與眾同爵為其賢豈容獨避亟祗申命毋費牢辭

賜皇兄居廣再辭免郊祀加恩不允仍斷來章

批答 十二月十六日

朕誕敷祭澤加恩宗盟亦既告廷豈容反汗亟祗成命

用對殊休

賜鄭恭再辭免郊祀加恩不允仍斷來章批答

十二月二十日

祭而受祉既欲及人臣也有勞又當與邑力辭為過祗受乃宜

賜士銖再辭免郊祀加恩不允仍斷來章批答

十二月二十一日

合周宗族以展精禋錫魯土田是均需澤亟祗朕命毋執而謙

賜李顯忠再辭免郊祀加恩不允仍斷來章批



答 十二月二十二日

親祠甫畢慶澤下延載疇扈衛之勞特厚褒嘉之寵毋留朕命益懋爾忠

賜劉懋 下全前 十二月二十九日

靈承天地陟配祖宗成一代之上儀涉萬方而大賚有如懿戚寧許終辭

乾道七年

賜虞允文辭免慶壽加尊號轉官進封不允批

答 正月二十四日

卿為時真宰相我盛容時加不次之恩用表非常之慶

亟承三接何事再辭

賜梁克家 下同前 正月二十四日

卿學貫古今識周事物助我寧親之志成茲希世之儀毋執經常亟膺寵秩

賜皇子慶王愷辭免進封魏王不允批答 二月

十一日

夙勤子道久奉王藩舉進律之褒章資維城之實効亟宜祗受勿事固辭

賜皇太子辭免立儲不允仍斷來章批答 二月

十一日



賢德修乎時敏英資見乎夙成乃協龜猶俾開鶴禁已  
誕揚于渙命毋荐貢于謙辭

賜皇子慶王愷再辭免進封魏王不允仍斷來

章批答 二月十二日

宛陵大藩江左重地賁加節錫封之寵為剖符分土之  
光宜念宗疆毋留朕命

賜皇太子辭免領臨安尹不允批答

四月二十九日

養德東宮既茂揚于多譽收民南府宜就正于群方成  
命已行謙辭可畧

乾道八年

賜虞允文再辭免除左丞相不允批答

二月十四日



賜龔茂良再辭免進書轉官不允仍斷來章批

答 三月十九日

紀中興之盛烈既上奏篇旌太史之多庸肆加懋賞亟

其祇受勿事謙辭

賜李彥穎

下同前

三月十九日

史觀成書講一時之盛典輔臣相禮進二等之崇階成命已行固辭奚益

賜吳拱再辭免除右金吾衛上將軍不允仍斷

來章批答 四月十二日

外臨方鎮內扈禁嚴非吾世臣不預茲選特下汝諧之詔亟思朕命之承

賜王淮再辭免除同知樞密院事不允仍斷來

章批答 八月六日



樞庭置貳兵政所關乃眷舊勞是加新渥已諒執諫之志亟思承命之恭

賜趙雄再辭免除端明殿學士簽書樞密院事

不允仍斷來章批答 八月六日

畱任輔臣異乎列職選求碩望協于師言既成命之已行豈冲懷之可徇

淳熙四年

賜皇子魏王愷辭免除荆南集慶軍節度使行

江陵尹不允仍斷來章批答 四月五日

雙節之頒實為異數三辭之禮備見勞謙蓋圖共理之

良為避惟行之令

賜趙雄再辭免除同知樞密院事不允仍斷來

章批答 十一月七日

卿獨贊兵謀備宣忠槩爰稽叅于人望俾進貳于樞廷出命莫回執謙毋過

淳熙五年

賜王友直再辭免殿前都指揮使不允仍斷來

章批答 三月六日

卿自典衛兵備宣忠力茲正使名之重以褒將畧之長詔諭甚勤謙懷毋執



賜錢良臣再辭免除端明殿學士簽書樞密院  
事不允仍斷來章批答 三月二十六日

樞廷之重其政所關用人益協于簽言錫命已孚于衆  
聽豈容控避往即欽承

賜史浩再辭免除少傅不允批答 十一月十七日

疇庸念舊貴老尊賢兼四者以申榮集群工而誕告豈  
容固避往即欽承

賜錢良臣再辭免除參知政事不允仍斷來章

批答 十一月十八日

朕簡求俊傑協贊幾衡胡為遜避之堅未諒眷知之厚

已批需牘亟服渙恩

賜王淮再辭免除樞密使不允仍斷來章批答

十一月二十二日

卿三踰歲筮四轉樞廷惟恩禮之加隆表眷知之方厚  
亟祗成渙毋守常謙

賜趙雄再辭免除右丞相不允仍斷來章批答

國莫難于置相人方慶于得賢乃守一謙至勤姿遜其  
視諄之命亟符赫之瞻

淳熙六年

賜曾覲除少保辭免不允批答 正月十三日



朕念舊興懷惟新錫命進孤班之峻秩易將闡之高牙  
已諭至恩毋煩多遜

賜再辭

秩加三少榮易十連雖申優異之恩不廢燕閒之樂于  
義為久固辭謂何

賜趙雄辭免勅令所進書轉官不允仍斷來章

批答 七月十六日

卿經邦道廣制法才高茲具覽于成書宜首膺于醴賞  
曾是一階之進豈勞三命之恭

賜王淮再辭免進會典轉官不允批答 八月七日

政隨時舉事以類從嘉儒林載筆之勤知樞輔提綱之  
舊進階示寵承命是宜

宣召學士口宣

宣召翰林學士王曦入院供職 乾道七年四月

有勅卿學經表業又繹皇猷洵更二制之華獨負一時  
之望召從東省還寘北門懋膺真拜之榮思稱久虛之  
選今差成忠卽充翰林書待詔錢茲就第召卿入院充  
學士想宜知悉

賜筵宴口宣

尚書省賜宰執以下喜雪御筵口宣



有勅隆寒在候瑞雪應時眷嗣歲之將臨喜豐年之有  
望宜同燕樂以洽歡娛 乾道六年十二月一日

六出飛空三登兆瑞陳多儀于鎬飲掩高會于梁園式  
厚燕胥固宜樂只 淳熙二年 內侍李思温

上天同雲平地大雪既彰和氣亦兆豐年宜于此事之  
堂錫以惠茲之宴 淳熙三年十一月十七日 內侍吳回

元冬凜冽密雪零霏古稱五穀之精今告三登之瑞趣  
頒燕飲共合歡康 淳熙四年 內侍讀康伯

貢院賜進士聞喜宴口宣 淳熙五年五月八日  
有勅唱名春殿樂得英髦設醴貢闈脩昭慈惠惟茲榮

遇其各欽承今差入內侍省東頭供奉官韓世榮賜  
聞喜宴想宜知悉

玉堂類稿卷第十二 終



玉堂類稿卷第十三

周益文忠公集一百十三

金國賀正旦使副口宣

乾道七年

赴闕盱眙軍傳宣撫問賜御筵

有勅卿等肅持瑞節來會春朝念馳傳之良勤命及疆  
而加勞錫之宴俎體我眷茲

鎮江府賜銀合茶藥

並係內侍何粥

有勅卿等謹于將命慶此發春既衝霰雪之寒復涉風  
濤之險豈無錫予用助保願

鎮江府賜御筵



有勅方歲更端寶隣修聘眷馳驅于遠道甫冒涉于長  
江宜錫宴觴用華使節

平江府賜御筵 內侍王裕

有勅三陽交泰四牡通歡乃眷輔藩有華候館載錫壺  
觴之樂少休輶傳之勞

赤岸賜酒果 內侍蔣侁

有勅卿等遠修隣好來慶王春事道路以良勤望闕庭  
而甚適其碩芳旨以勞皇華

赤岍賜御筵 內侍徐永叔

有勅卿等聯華擁節奉幣朝春念久涉于修塗命少休

于近館時頒宴飲深體眷懷

賜使副春幡勝

有勅歲律將新春陽先至言念光華之使馳分鏤刻之  
工體我眷懷應茲嘉節

賜三節人從春幡勝

有勅汝等並從信使來慶春朝望北闕以有期值東風  
之應律分頒在首悅懌承恩

賜接伴使副春幡勝

有勅卿等祇承明命遠迓使華因巧曆之回春自尚方  
而馳賜往應賁飾共樂芳時



到闕賜生餼 內侍符思永

有勅卿等來慶王春甫安賓館匪厚餼牽之錫曷酬軫傳之勞其體眷懷以承恩渥

到闕賜被褥沙羅等 內侍李回

有勅卿等遠慶新元甫安上館維衾綢之加厚且器用之甚華併示匪頒欽承殊渥

歲除賜內中酒果 同前

有勅卿等言持使節甫達聘儀出醪核于嚴宸循壺觴于除夕茲惟寵錫尚體醴恩

正月一日入賀畢歸驛賜御筵 內侍李月卿

有勅芳春肇序華使來賓既奉幣以退朝宜賜筵而在館體茲宸渥醕乃燕觴

入賀畢歸驛賜酒果 內侍董璉

有勅展儀改歲復從舍館之安加禮待賓載厚果醪之賜式昭眷遇祗服寵頒

正月三日賜內中酒果 內侍麥敬

有勅使華之美已慶發春臺饋之豐宜無虛日出珍嘉于御府助燕樂于芳時

正月四日玉津園射弓賜弓箭例物 內侍陸彥端

有勅傲氣回春皇華成禮命宏開于禁籞俾申講于射



儀宜有匪頒用將厚意

玉津園射弓賜御筵

內侍韓世榮

有勅卿等恪修隣好祇慶春元爰成命射之儀就啓娛賓之宴往膺異數用洽多歡

玉津園射弓賜酒果

內侍鄧珪

有勅歲華有俶春色始和少紓行李之勞載展穿揚之藝特加珍錫往侑宴觴

正月六日朝辭歸驛賜酒果

內侍李顯

有勅卿等告行闕下治任驛中惟隣好之克修申眷懷而未已錫之芳旨服我龍光

朝辭歸驛賜御筵

有勅卿等謹于將命慶此履端念返旆之有期想騰裝之良勸宜頒燕集式示寵私

密賜使副大銀器

內侍王公昌

有勅卿等來會春朝少休謁舍宜厚中金之錫以增行索之光尚克欽承式符眷賚

回程賜龍鳳茶并金鍍銀合

內侍霍汝弼

有勅春入東郊既講會朝之禮貢分北苑用為返旆之光雖舉賜常寶昭眷寵

回程赤岸賜御筵

內侍朱思正



有勅卿等已祝春祺式旋使節望征帆之未遠開宴席  
以少留毋惜滿觴載光行色

回程赤岍賜酒果 內侍李唐弼

有勅卿等禮成獻歲道次郵亭念涉履之方勤軫眷懷  
而良厚既陳燕飲仍錫旨嘉

回程平江府賜御筵 內侍蘇駿

有勅卿等奉幣朝春回車涉遠念餘寒之尚力次近輔  
以少留載示惠慈厚頒膏飫

回程鎮江府賜御筵 內侍徐偁

有勅卿等比緣歲旦來講隣歡茲返旆于折津暫停驂

於京口宴觴甚寵恩渥其承

回程盱眙軍賜御筵 內侍譚何

有勅卿等已慶王春式旋使節念載馳於遠道命少駐  
於邊城無惜屬饜以承渥賜

乾道八年

正月三日賜內中酒果 內侍梁琳

有勅乃眷使華務隆恩意輟甘芳于六尚助燕樂于初  
春維是寵頒往其欽受

正月四日玉津園射弓賜弓箭例物 內侍朱思正

有勅春色初和射儀載肅式旌使範是來賜常頒錫命



之有隆尚拜嘉而無斁

玉津園射弓賜御筵 內侍王公昌

有敕方篤隣歡載優賓禮綵勝宜春之日彤弓展射之時宜厚宴昏併資樂只

玉津園射弓賜酒果 內侍麥啟

有勅氣淑春郊禮成射圃灑香醪于玉斝粲芳實于瑯盤匪我嘉賓孰昭殊遇

正月六日朝辭訖歸驛賜御筵 內侍符思永

有勅卿等展儀獻歲授館浹旬甫陳告別之言載厚將歸之禮惟茲示惠可以忘勞

朝辭訖歸驛賜酒果 內侍鄧珪

有勅卿等既陪元會甫告行期百壺良潔之英多品甘馨之實并申優遇當體至懷

密賜使副大銀器 內侍譚何

有勅卿等已慶端辰甫辭廉陛欲佐歸裝之用是放珍幣之華眷待有加欽承無斁

回程賜龍鳳茶并金鍍銀合 內侍黎興祖 正月八日

有勅卿等飛蓋東風茲為引道分珍北苑于以示恩無忘拜賜之恭庸體睦隣之意

回程赤坼賜酒果 內侍何弼



有敕卿等旋車云邁置錢有常出珍賜于宸廷侑宴歡  
于郊館推予恩渥寵乃賜華

回程赤岍賜御筵 內侍黃述

有勅卿等既成聘好方即歸塗宜少駐于郊閔俾載伸  
于燕餞式將厚遇聊慰遐征

回程平江府賜御筵 內侍徐永叔

有勅卿等夙駕歸艤少休會府特舉肆筵之禮冀忘握  
節之勞益洽恩私用紓行役

回程鎮江府賜御筵 內侍徐侑

有勅卿等還轅易水弭蓋京江雖並驚于歸心尚曲留

于別宴勿辭酣飲庸對芳辰

回程盱眙軍賜御筵 內侍董璉

有勅卿等並修使事還賜邊亭尚當春候之融和 忘  
征塗之勸勸少留祖席尚體眷懷

淳熙三年

赴闕盱眙軍傳宣撫問賜御筵

有勅卿等恪修隣好來會春元宜賜宴于邊城用增華  
于使驛毋辭劇飲庶體濃恩

賜使副春幡勝

有勅使來北道春兆東郊允懷將命之勤爰有應時之



錫載茲嘉惠浣乃征塵

賜三節人從春幡勝

有勅卿等受命中朝迓賓北道當迎春之令旦頒插道之多儀敬體朕懷增光使事

赴闕鎮江府賜銀合茶藥

有勅卿等肅將使指來觀春朝念寒色之嚴凝布恩言而存撫仍頒飲劑用助保調

鎮江府賜御筵

並係內侍謝安民

有勅玉曆開端寶隣修聘念衝寒而利涉爰錫燕以示慈徃體眷懷勿辭飲醕

平江府賜御筵

內侍梁琳

有勅卿等適當冬凜來慶春元念使事之良勤即輔藩而少駐特頒宴惠尚體眷私

赤岸賜御筵

內侍張思溫

有勅歲事一新隣歡載睦嘉使殮之近止秩賞宴以樂胥遠屬隆寒固宜霑醉

赤岸賜酒果

內侍王敦禮

有勅卿等遠慶新春甫臨近驛錫上尊之醇旨豐庶品之珍甘茂對恩華增光使節

十二月二十八日賜生餼

內侍韓世崇



有勅卿等抵講歲儀夙行賓禮停驂在館浸休涉履之勞維籩及牽往示眷懷之厚

歲除賜內中酒果 內侍賈惟清

有勅卿等來慶春朝遠臨除夕賜以芳樽之旨侑之苑實之多併寵使華尚欽恩遇

正月一日入賀畢歸驛賜御筵 內侍李唐卿

有勅卿等將命北鄰展儀上日爰即驛亭之遂就頒燕豆之華庸示寵光尚均愷樂

入賀畢歸驛賜酒果 內侍朱思正

有勅元會告成賓容甚肅爰賜燕觴之助用資鷄旦之

勸維是昔嘉式彰優異

正月三日賜內中酒果 內侍王敦禮

有勅卿等已慶春朝少安館次特厚宮庭之賜併為觴俎之華茂對恩私益光使指

玉津園射弓賜弓箭例物 內侍吳因

有勅熙春日永禁籟風和載講射儀備觀使範爰厚頒宣之寵用昭眷獎之恩

玉津園射弓賜御筵 內侍陸彥端

有勅交歡隣壤已肅賓儀觀德春郊更優射藝宜特頒於燕飲尚深體於眷私



玉津園射弓賜酒果

內侍張詠

有勅卿等遠慶春元載陳燕射尊實既多之醞盤盈孔  
庶之羞眷待有加欽承無斁

淳熙四年

赴闕平江府賜御筵

內侍梁襄

有勅卿等遠冒臘寒來趨歲節即中和之會府陳列俎  
之多儀既勞使華仍昭眷禮

十二月二十四日赤岸賜御筵

內侍張思溫

有敕歲律將新使禮並驚雖慶賀之未展在馳驅而甚  
勞爰即郊闕就頒燕飲

赤岸賜酒果

內侍謝安民

有勅歲功默運做慶新春隣使遠來益修舊好迎頌醪  
核寵勞駉駉

十二月二十五日到闕就驛賜衾褥鈔羅

內侍

吳椿年

有勅卿等冒茲冬凜會我春朝既從舍館之安宜具燕  
私之用睦隣厚矣稽首承之

十二月二十八日賜使副春幡勝

內侍李琪

有勅土牛鞭春使壯在館綵勝春幡之巧珍羞名醞之  
豐示我渥恩對茲佳節

每人渾金大春幡一副五事件  
背羅大春幡勝一副鐵頭紙帖



落春盤每人肉七筋生鷄鴨子各十五箇軟餅五十箇菜四筋法酒四瓶饅餅三十箇

賜三節人從春幡勝

有勅汝等夙對天墀適逢春日欲示眷懷之渥宜頒鏤刻之工

賜生餼 內侍何弼

有勅卿等已達聘儀少安謁舍爰舉餼牽之禮用酬跋涉之勞式是眷懷尚欽飲賜

歲除賜內中酒果 內侍賈惟清

有勅眷言嘉客遠慶元正酒分金殿之醇果富瑯盤之品用資守歲以示發春俟

歲除賜內中酒果 內侍宋映

有勅卿等持節造朝停驂在館將展發春之慶有懷守歲之歡錫以旨嘉資其燕飲

正月一日入賀畢歸驛賜御筵 內侍陸彥端

有勅卿等歲華伊始賓禮具成即其舍館之安錫以壺觴之樂勿辭饜飲用迪眷存

入賀畢歸驛賜酒果 內侍王楫

有勅卿等遠持瑞節來會春朝既展慶于大庭方留裝於上館趨頒醪核往佐豆觴

正月三日賜內中酒果 內侍朱思正



有勅卿等遠慶元正深嘉使範推禁中之甘旨為館下  
之光華惟是寵頒昭吾殊勝

玉津園射弓賜弓箭例物

內侍謝安民

有勅春和凝籥如射穿楊觀賓禮之甚修知隣歡之滋  
輯宜加錫賚用示眷私

玉津園射弓賜酒果

內侍賈惟清

有勅玉津開瑞寶隣繼好眷娛賓之厚禮有觀德之多  
儀爰錫甘芳用酌審固

玉津園射弓賜御筵

內侍高思聰

有勅肇易歲華遠勤隣聘已講壽觴之禮再觀射藝之

儀將寵

私特申宴惠

正月六日朝辭訖歸驛賜酒果

有勅卿等夙慶春華適違黼坐厚乃旨嘉之錫燕其稱  
媿之勞當體立懷聿成嘉惠

朝辭訖歸驛賜御筵

內侍李琪

有勅卿等獻歲成儀授書復命言念歸裝之束是宜燕  
席之開咸體異恩毋辭霑醉

密賜使副大銀器

內侍何弼

有勅卿等聯駕聘軺恪遵元會器厚滋山<sup>滋</sup>之錫禮優將  
命之勤尚體恩華益光賓範



回程賜龍鳳茶并金鍍銀合 內侍黃敞  
有勅卿等具成慶禮已告行期分北苑之清風醒春郊  
之歸夢有華邦錫用獎賓儀

初九日赤岸御筵賜館伴使副春幡勝 內侍董友聞

有勅卿等膺被朝掄應酬使客惟芳春之令序有節物  
之常儀茲謂寵頒毋忘祗戴

賜金國使副春幡勝 同前

有勅卿等既竣事已驚歸舟眷言郊餞之時適契鞭  
春之日寵頒節物昭示恩華

賜三節人從春幡勝 同前

有勅汝等來慶元正端逢令序是頒節物以對春光

赴闕鎮江府賜御筵 內侍徐考叔

有勅歲律將新使華遠暨既涉風濤之險又衝雪霰之  
寒宜啟燕觴少休征擢

鎮江府賜銀合茶藥

有勅四序更端兩邦結好乃眷皇華之使方臨鐵甕之  
城錫以珍良助其服食

平江府賜御筵

有勅芳春將屆膚使遠來久衝朔漠之寒少憇姑蘇之  
館就頒宴飲昭示慈懷



赤岍賜酒果 內侍藍師古

有勅卿等抗旌賀歲飛擢及郊載稽勞問之儀特厚旨嘉之錫式昭予眷諒慰爾心

赤岸賜御筵 內侍李琪

有勅卿等並涉修塗來趨新歲艤舠于近岸飛瓊竿于華筵藉示湛恩用光聘使

到闕賜被褥沙羅 內侍鄧椿年

有勅卿等遠趨歲旦初憇驛亭首加錫賚之豐兼適寢興之用將予厚意俾爾如歸

十二月二十八日賜生餼 內侍何弼

有勅卿等修好寶隣展儀春殿方旅陳於書幣宜加錫於餼牽式是寵私尚其祇服

正月一日入賀畢歸驛賜酒果 內侍王楫

有勅元會告成嘉賓就憇欲加隆於恩意爰就錫於甘芳勿謂常頌尚思祇服

入賀畢歸驛賜御筵 內侍楊彬

有勅獻筭宸廷已講發春之禮飛觴驛舍是資卜畫之歡式宴嘉賓往欽厚意

正月三日賜內中酒果 內侍徐考叔

有勅芳春意淑素月魄生嘉使介之成儀佇驛亭而俟



燕載頌醪核昭示眷私

正月四日玉津園射弓賜御筵 內侍高思聰

有勅卿等祇慶春元益修隣好嘉乃朝儀之肅復茲射  
藝之精宜命賜筵用酬中的

玉津園射弓賜酒果 內侍朱思正

有勅弧矢之威古今所重是將觀德非獨娛賓方展藝  
於春郊宜助歡於禮飲

淳熙五年

赴闕盱眙軍傳宣問賜御筵 內侍李唐卿

有勅卿等遠冒臘寒來趨歲節念初臨於邊郡宜加勞

於征軒肇錫燕觴飲承眷禮

赴程赤岸賜酒果 內侍董友聞

有勅卿等已慶芳春式遙歸旆眷少留於近岼益加厚  
於常頌惟是渥恩尚其祇服

回程赤岸賜御筵 內侍何弼

有勅卿等言趨歲節嘉修好之有常於邁春郊念遵塗  
之未遠宜開寵餞用資歸裝

回程平江府賜御筵 內侍李昂

有勅奉幣上春已締兩朝之好飛觴近堞式華四牡之  
歸祇服眷私勿辭飲醕



回程鎮江府賜御筵 內侍謝憲

有勅卿等祇慶歲端迨歸朔塞歷江城而少駐屬春律之餘寒大啟燕觴丕昭眷寵

回程盱眙軍賜御筵 內侍梁襄

有勅卿等稱觴歲旦旋旆朔庭將利涉於長淮爰示慈於華燕茲惟寵餞以賁征鞍

淳熙六年

正月六日朝辭訖歸驛賜酒果 內侍賈惟清

有勅卿等春元成禮謁舍騰裝錫以香醪貳之嘉寶既示寵綏之意仍茲宴飲之歡

朝辭訖歸驛賜御筵 內侍李琪

有勅卿等謁辭春殿歸憩驛亭思加恩於賓儀爰就開於宴席尚欽慈惠益洽歡娛

回程赤岸賜御筵 內侍何弼

有勅卿等已慶春元式迨歸旆欲示使華之寵載伸郊餞之儀方屬餘寒勿辭霑醉

回程鎮江府賜御筵 內侍梁彬

有勅春風應律揚歸旆於載塗北固留賓秩華筵而示惠尚欽眷渥益洽歡娛

金國賀會慶節生辰使副口宣



乾道六年

玉津園射弓賜弓箭例物

內侍王裕

有勅卿等遠奉使華來修誕慶連采蘋之樂節講上苑之射儀特錫珍良少酬審固

十二月二十三日玉津園射弓賜酒果

內侍徐偁

有勅卿等甫展慶儀言游靈囿彤弓盧矢庸觀德於射候嘉核芳醪併示慈於宴席

玉津園射弓賜御筵

內侍韓世榮

有勅卿等稱慶宸廷展儀射圃稽周雅序賓之義合魯人揚解之言宜命加籩式旌

密賜使副大銀器

內侍黃述正使一千兩副使五百兩

有勅卿等遠奉使華恪修慶禮誠効嵩呼之祝器頌山溢之珍宜即欽承用符眷遇

回程賜龍鳳茶并金鍍銀合

內侍霍汝弼鄭朝美

有勅卿等已奉壽觴式迺歸旆爰分放於貢茗庸少浣於征塵其體至懷以承嘉錫

朝辭訖歸驛賜御筵

內侍麥敞

有勅卿等已慶電樞方違象魏眷皇華之在館命高曾以飛觴茲謂醲恩勿辭霑醉

又賜歸驛酒果

內侍王公昌



有勅卿等備成慶禮甫上謁辭出醪核於禁庭侑杯盤  
於館燕往承嘉惠共體湛恩

回程賜使副冬至節絹

內侍朱思正使副各五十足

有勅卿等比緣誕序遠穆賓華前驅已戒於北歸中道  
適逢於南至爰分厚幣用侈多儀

回程賜三節人從冬至節絹

上節絹各八足內都管二人各十二

足中節各五足下節各三足

有勅汝等言從慶使並驚歸途值來復之新陽舉匪頌  
之故事各膺厚賜尚體隆恩

回程赤岍賜酒果

內侍李顥

有勅卿等稱觴壽旦返旆霜冬念甫事於遐征俾少休  
於近驛載放芳旨加厚眷私

回程赤岸賜御筵

內侍蔣忱

有勅卿等來慶誕辰備成使事方旋車於遠道姑弭節  
於近郊載厚眷懷特伸燕餞

回程平江府賜御筵

內侍李唐弼

有勅卿等修慶誕期趣裝歸路預飾輔藩之館少休使  
節之驟其錫燕觴以優賓禮

回程鎮江府賜御筵

內侍朱思正

有勅卿等榮抗使旌遠敦鄰寶肆展流虹之慶載勤馳



驛之歸錫宴南徐增華北道

回程盱眙軍賜御筵

內侍鄧珪

有勅卿等壽儀既講使範有光歷候館以及疆指長淮而利涉宜陳燕俎以寵歸鞍

乾道七年

赴闕盱眙軍傳宣撫問賜御筵

內侍符思永

有勅卿等遠馳使驛來慶流虹有懷將命之勤當厚及疆之勞其陳宴俎以洽賓歡

赴闕鎮江府賜銀合茶藥

內侍張思溫

有勅卿等並飭使車來趨誕節偃薄風霜之肅馳驅川

陸之脩宜厚匪放用資真攝

鎮江府賜御筵

同前

有勅卿等肅將使指祇講壽儀歷候館以寢深錫宴觴而加厚勿辭燕樂庸釋勤勞

平江府賜御筵

內侍鄭大亨

有勅誕序將臨隣歡載講眷馳輶於遠道命弭節於近藩儼爾豆籩示予慈惠

赤岸賜酒果

內侍李唐卿

有勅卿等遠馳四牡來祝萬年錫以醇醪貳之甘實併示迓近郊之勞欽承厚禮之敬



赤岸賜御筵 內侍韓世榮

有敕卿等並持瑞節來奉壽觴勤遠役於初寒豐宴遵於近館有華茲禮其肅而承

到闕賜被褥鈔羅 內侍王公昌

有敕卿等來陳壽祝益締隣歡甫從舍館之安宜具燕私之用茲惟寵錫其即欽承

到闕賜內中酒果 內侍徐永叔

有敕卿等甫達慶絨即安賓館惟是醇甘之品皆吾飲御之珍輟以示恩體茲加禮

十月二十二日上壽畢歸驛賜御筵

有勅奉萬年之觴方歸安於上館啟百籩之宴宜就秩於初筵毋惜屬饜以承渥惠

上壽畢歸驛賜酒果

有勅卿等適稱壽華爰憇驛亭錫之九醞之醇侑以百嘉之實既推賜式亦獎賓儀

十月二十三日賜內中酒果 內侍李琪

有勅華車照路方觀射圃之歸嘉賓薦觴載出禁楹之賜茲惟厚遇匪曰常頒

玉津園射弓賜弓箭例物 內侍王裕

有勅卿等遠飭聘車來趨誕節惟娛賓之盛禮有觀德



之舊儀嘉乃和容申之蕃錫

玉津園射弓賜御筵

有勅卿等甫伸慶祝庸講射儀諒弧矢之宣勤設鼓鐘而肆饗茲惟厚禮併寵嘉賓

玉津園射弓賜酒果

有勅卿等奉幣誕辰禮無違者展儀別圃射則減兮欲資燕飲之歡特厚醇甘之錫

淳熙二年

到闕賜被褥鈔羅 內侍韓世榮

有勅卿等並冒初寒來趨載誕憇駮而授館頒器幣

以宣恩聊浣遐塵即宜欽受

到闕賜生餼 同前

有勅誕節應期使輅將命念初安於館舍宜厚賜於餼牽庸示撫存以昭矜遇

二十一日賜內中酒果 內侍李琪

有勅卿等夙駕征驂恪修誕慶均清醇於玉斝貳甘脆於瑀盤聊尉積勤併將厚意

十月二十二日上壽畢歸驛賜御筵 內侍王裕

有勅卿等倣稱壽斝歸憇驛亭眷祗命之良勤宜肆筵而加勞庸將殊遇併禦凝寒



上壽畢歸驛賜酒果 內侍徐佺

有勅寶隣修聘適展於壽儀珍果侑觴隨頌於賓館式是眷懷之厚且酬拜舞之勞

二十三日賜內中酒果 內侍黃述

有勅卿等已奉壽觴方需燕禮出芳尊於尚醞分嘉實於大官併寵使華欽承恩幄

玉津園射弓賜弓箭例物 內侍梁彬

有勅卿等誠通北道慶祝南山惟掌客之舊儀有射侯之故事宜推蕃錫用獎嘉賓

玉津園射弓賜酒果 內侍王允修

有勅卿等入壽宸廷堅睦隣之永好出觀禁籞展發之和容加錫珍芳式資飲御

玉津園射弓賜御筵 內侍謝安民

有敕祝萬年於北闕使範可嘉共三之於上林射儀更肅可無燕席以洽賓歡

二十七日賜內中酒果 內侍王敦禮

有勅飛電流虹歲勤隣聘醇醪嘉果日致恩頌惟茲賓禮之優示乃使華之寵

密賜使副大銀器 內侍張思溫

有勅千秋紀節九牧貢金特推制噐之餘庸示待賓之



禮庸予賜式寵乃使華

朝辭訖歸驛賜酒果 內侍謝憲

有勅卿等既成慶禮倣告行期存頌品物之珍庸助盃盤之樂增光謁舍胥洽宸恩

朝辭訖歸驛賜內御筵 內侍張思溫

有勅卿等申祝堯年告違漢陛舉加邁之厚禮致設醴之醴思言念將臨何辭盡醉

回程賜使副冬至節絹 同前

有勅卿等來會誕辰歸逢令節禮厚庫緜之錫恩隨宮線之添滌乃征塵被予渥惠

回程賜三節人從冬至節絹 同前

有勅汝等並從使節來祝壽祺言念歸塗適逢至日其令賜帛以助禦冬

回程赤岸賜御筵 內侍張思溫

有勅展縟儀於壽旦已歸隣歡弭歸棹於侯亭載陳飲餞茲惟示惠亦以紓勞

回程赤岸賜酒果 內侍張詠

有勅飛綏遐暨嘉請祝於修齡犯輶遄歸尚眷留於近岸馳放醪核益溥龍光

回程平江府賜御筵 內侍賈惟清



有勅漢殿稱觴已効萬年之祝吳門錫宴用華四牡之  
婦矧屬凝寒固宜盡醉

回程鎮江府賜御筵

有勅卿等遠慶誕辰式迨歸旆將問津於江滸聊弭蓋  
於藩方載洽矇私是頌燕勞

回程旸昭軍賜御筵 內侍王楫

有勅卿等遠持壽禮申締隣歡驚歸旆以良勤即遵亭  
而少駐載陳宴豆腐餞使華

淳熙三年

玉津園射弓賜弓箭例物 內侍王敦禮

有勅卿等並抗使旌來趨誕節禮容有肅射藝可觀宜  
厚匪頌用昭眷寵

玉津園射弓賜御筵 內侍李唐卿

有勅卿等瞻言苑囿近在郊坰弓矢斯張適宜於冬凜  
豆籩有楚併洽於賓歡

玉津園射弓賜酒果 內侍鄭安祖

有勅慶流虹之節已觀宸廷展中鵠之儀言游禁籞特  
頌芳旨庸示寵光

朝辭訖歸驛賜御筵 內侍張思溫

有勅卿等遠修邦好肅講壽儀已告行期少休謁舍爰



就開於燕席宜深體於宸恩

朝辭訖歸驛賜酒果 內侍楊慶祖

有勅卿等恪修隣好來慶誕符茲成禮以告行乃授書  
而少憇載頒醪核昭示眷懷

回程賜龍鳳茶并金鍍銀合 內侍李宗因

有勅禮成誕節榮鶯歸鞍有華貢茗之盼庸厚賜車之  
寵雖云於邁可以忘勞

回程賜使副冬至節絹 同前

有勅卿等曩馳使驛虔奉壽觴逮四牡之邁歸值一陽  
之來復豈無恩賜庸示眷私

賜三節人從冬至節絹

有勅汝等有陪壽禮並鶯歸途屬至日之舒長念嚴程  
之勤勩錫之幣帛體我眷懷

回程赤岸賜酒果 內侍黃鑄

有勅卿等遠飾使裝來趨誕節歸舟載旆甫歷於候亭  
嘉實薦觴更將於恩意

回程赤岸賜御筵 內侍張思温

有勅卿等屬奉壽觴茲旋使節掛帆而未遠經別岸以  
少留欲示眷私更伸燕餞

回程平江府賜御筵 內侍梁彬



有勅卿等既奉壽觴式迺歸擢卽蘇臺之與壤申燕俎  
之多儀尚體茲惠何辭盡醉

回程鎮江府賜御筵

內侍宋思正

有勅卿等已會誕期式迺歸旆惟是丹陽之館臨於天  
塹之津再啟壘尊少休徒御

回程盱眙軍賜御筵

內侍徐考叔

有勅卿等奉觴無爽出境有期爰卽還城再開華宴將  
予厚意尉爾遐心

淳熙四年

赴闕昭盱軍賜傳宣撫問御筵

內侍王楫

有勅卿等遠趨誕節甫次邊城念跋履之良勞宜撫存  
之加厚就頒燕衍深體眷懷

赴闕鎮江府賜茶藥

有勅卿等並持使節來會誕辰嘉遠涉於川塗特馳頒  
於茗劑諒體眷懷之厚頓忘行邁之勞

鎮江府賜御筵

並係內侍陸彥暉

有勅華渚流虹遠勒輶傳朱方錫燕爰啟尊壘其體湛  
恩勿辭霑醉

平江府賜御筵

內侍賈惟清

有勅卿等展儀誕序弭楫輔藩馳遣侍璫就開燕席飲



此渚矣于胥樂兮

十月十八日赤岸賜御筵 內侍何弼

有勅卿等言馳遠道契飛電之嘉辰爰即近郊霑霑雲之異渥諒增華於使節宜深體於眷懷

赤岸賜酒果 內侍李鼎

有勅使華有信及茲誕慶之期郊勞加隆申以甘芳之錫尚祇眷渥庸洗征塵

十月十九日到闕賜被褥鈔鑼 內侍鄧椿年

有勅卿等並膺遴選來會誕期肆頒服御之珍俾適燕私之用茲惟異數以寵嘉賓

十月二十一日賜內中酒果 內侍李琪

有勅卿等來慶誕祥甫修觀禮輟禁局之醪核華賓驛之豆觴有腆于頒宜欽而受

十月二十二日上壽畢歸驛賜御筵 內侍李唐卿

有勅稱壽于庭隣歡備講示慈於館宴席闋開既酬行禮之勞且厚待賓之意

上壽畢歸驛賜酒果 內侍徐考叔

有勅千秋紀節百辟稱觴嘉華使之來庭成令儀而歸驛宜頒芳旨用洽眷私

十月二十三日賜內中酒果 內侍藍師古



有勅卿等遠將隣聘夙講壽儀念舍館之少安宜旨嘉之載錫是資燕飲其克欽承

王津園射弓賜弓箭例物 內侍謝憲

有勅嘉乃使華聞於射藝既效椿齡之祝肆觀揚葉之穿特厚匪頒用昭眷禮

王津園射弓賜弓箭例物 內侍宋敏

有勅醇醪列盞嘉實盈盤眷言慶壽之實再講和容之禮併茲寵錫往即欽承

王津園射弓賜御筵 內侍梁襄

有勅稱壽廣庭威儀甚肅射侯別圖技藝尤精宜儉豆

觴用娛賓客

十月二十六日到闕賜生餼 內侍何弼

有勅卿等通歡隣壤展慶誕辰已備輯於多儀方少安於上館茲庸續食用勸加餐

十月二十七日賜內中酒果 內侍黃鑄

有勅宸廷獻箏已祈千萬之年嘉食侑觴茲有再三之錫出於御府光乃賓筵

密賜使副大銀器 內侍李琪同日

有勅卿等慶壽遠來受書遙返身未離於丹闕器加錫於白金各體異恩欽承加惠



十月二十八日朝辭訖歸驛賜酒果

內侍高思聰

有勅卿等自初稱壽暨此告行嘉儀範之可觀知虔恭之匪懈再頒醪核往助盃盤

朝辭訖歸驛賜御筵

內侍賈惟清

有勅卿等來奉壽觴具成賓禮分驪駒之將駕儼籩豆之前陳屬此初寒均茲既醉

十月二十九日回程賜龍鳳茶并金鍍銀合

內

侍李宗回

有勅卿等奉觴誕日憇館來旬念將據於歸鞍庸分頒于貢茗茲惟渥惠以寵行人

回程赤岍賜御筵

內侍李琪

有勅卿等祝萬年之壽為十日之留爰即近郊更開別燕庶益光於行色尚深體於眷懷

十一月一日回程赤岸賜酒果

內侍楊純

有勅卿等既成壽禮載鶩歸舟即別岸以少留馳近璫而加勞錫之甘旨體我眷私

回程平江府賜御筵

內侍謝安民

有勅卿等効祝南山言歸北道念勞神於遠役爰設醴於近郊寒色方嚴飲觴宜醕

回程鎮江府賜御筵

內侍朱思正



有勅使範從容既藏儀於誕節歸途安穩載弭撤於江城就錫燕觴丕昭眷渥

回程盱眙軍賜御筵 內侍梁彬

有勅卿等奉觴辰月還軫仲冬指淮岸以於歸即邊城而少駐馳開燕俎寵餞使擅

淳熙五年

赴闕盱眙軍傳宣撫問賜御筵 內侍梁襄

有勅卿等來趨誕節甫次邊城肆伸加勞之儀乃厚初筵之錫茲惟異寵其克丕欽

赴闕鎮江府賜茶藥

有勅卿等遠馳瑞節來奉壽觴永惟冒涉之勞良軫眷懷之厚馳頒茗劑往助調攝

鎮江府賜御筵 並係內侍陸彥端

有勅卿等並將使指來會誕期念初涉於長江盍少安於會府特頒燕衍昭示寵私

平江府賜御筵 內侍謝憲

有勅卿等並駕使帆遠趨壽節即蘇臺之勝地開賓席之華筵方履初寒所宜盡醉

赤岸賜酒果 內侍李禹

有勅卿等遠持聘幣來慶誕祥眷舟御之良勞望都城



而浸適宜頌芳吉式是眷存

赤岸賜御筵 內侍何弼

有勅卿等抗旌獻壽馳傳及都宜修郊勞之儀以作使  
華之寵勿辭飲醕用對眷懷

十月十八日到闕賜內中酒果 內侍李唐卿

有勅誕節及期使華在館欲示眷私之意爰分禁苑之  
珍有腆于頌宜欽而受

十月二十一日上壽畢歸驛賜酒果 內侍謝安民

有勅卿等遠隣好初奉壽觴即其舍館之安申以果醪  
之賜尚惟祇服庸體眷懷

上壽畢歸驛賜御筵

有勅卿等通兩國之歡祝萬年之壽甫成慶禮還憇驛  
亭宜就放於燕觴尚欽承於飲賜

十月二十三日賜內中酒果 內侍朱思正

有勅卿等既祝壽齡方需宸燕欲厚比隣之好爰分中  
禁之甘其克丕欽以承異渥

玉津園射弓賜弓箭例物 內侍黃鑄

有勅卿等誕期再及華使遠來惟茲郊射之行時乃邦  
儀之重宜推珍錫以寵嘉賓

密賜使副大銀器 內侍李琪



有敕壽儀既講使範有光欲昭示於隣歡特寵嘉於密  
賚尚其祇受體此眷私

回程賜龍鳳茶并金鍍銀合 內侍李宗回

有敕獻壽南山已成賓禮分珍北苑用寵使華併錫寶  
匱尚欽宸渥

回程平江府賜御筵 內侍徐考叔

有勅卿等奉觴壽旦返旆朔陸夙戒蘇臺寵頌宴 尚  
體有加之意用舒予邁之勞

回程鎮江府賜御筵 內侍李唐卿

有勅卿等遠持慶禮備講壽儀當寒色之凝嚴眷歸塗

之勤勩即茲江國錫以燕觴

回程盱眙軍賜御筵 內侍賈惟清

有勅卿等展儀誕節復命隣封將利涉於長淮宜少留  
於邊郡特開宴席用勞歸鞍

淳熙六年

赴闕鎮江府賜茶藥 內侍王楫

有勅卿等遠將信幣抵會誕期念涉履之良勞軫眷存  
而特厚馳頌茗劑庸輔保調

鎮江府賜御筵 同前

有勅祝南山之壽遠驚使疆經北固之城寵開燕俎肆



厚睦隣之禮 增將命之華

平江府賜御筵 內侍李昂

有勅卿等恪修隣好來慶誕辰揚舟旆以迨征即 藩  
而少駐特開華宴以示眷懷

赤岸賜御筵 內侍梁暉

有勅卿等抵講隣歡恪趨誕辰眷遵塗之甚遠欣弭節  
之有期爰即近郊特開華宴

賜被褥鈔羅 內侍韓世榮

有勅卿等遠涉初寒恪趨載誕錫以寢茵之具貳之器  
用之良併示眷懷祇承禮遇

十二月二十二日上壽畢歸驛賜酒果 內侍何弼

有勅誕期甫及聘使遠來居然有肅之容厚 無疆之

祝隨頒芳旨少酢恭勤

賜內中酒果 內侍梁暉

有勅卿等遠馳使節宿展壽儀茲弭節於驛亭繼分珍  
於禁苑有加之禮宜肅其承

玉津園射弓賜御筵 內侍陸彥端

有勅賓輶遠暨禁籞宏開觀克敬之威儀知素閑於弧  
天就頒燕勞昭示寵綏

朝辭訖歸驛賜御筵 內侍李琪



有勅卿等遠馳慶幣來會誕期既成禮以展辭將復書以戒路就頒燕勞昭示眷留

密賜使副大銀器 內侍梁晬

有勅卿等祇講慶儀備成使事錫未提之瑞器實北道之歸裝眷待有加欽承無斁

回程賜龍鳳茶并金鍍銀合 內侍李宗回

有勅卿等奉觴成禮旋旆屆期指貢焙以分珍寶寶匱而加賜推予眷意寵乃使華

回程赤岍賜御筵 內侍黃鑄

有勅卿等肅駕歸艫暫留近岍欲示勤渠之意再頒慈

惠之恩方屬嚴凝勿辭霑醉

回程平江府賜御筵 內侍朱思正

有勅奉觴良月彌堅兩國之歡旋擢仲冬少憇三吳之勝就開華宴加寵行人

玉堂類稿卷第十三 終



玉堂類稿卷第十四

周益文忠公集一百十四

天申會慶設醮青詞朱表

丁亥本命詞表附

乾道六年

太一宮開啟太上皇后生辰設醮青詞

伏以清秋過半慈闈臨彌月之期丹悃由中靖館罄後天之祝既恪陳于馨荐復高詠于靈篇伏願誠徹九霄祥開萬壽皇矣上帝倘垂有赫之光至哉坤元永篤無疆之慶

滿散朱表

伏以厚德難名固集壽齡之永誕辰俯既必修子道之



恭爰即殊庭仰祈冲鑒願契媧皇之得道更同金母之  
長生

茅山崇禧觀開啟會慶節道場青詞

孟冬紀月甲觀開祥瞻句曲之名山寶茅君之福壤敬  
哀羽士祇款琳宮冀悃幅之上通紛祺祥之下集

滿散朱表

伏以載臨誕日肅舉真科迺續永年豈獨眇冲之專饗  
導迎和氣所祈黎庶之均休仰冀聰聞具孚誠意

萬壽觀會慶節設醮青詞

伏以序正孟冬時臨誕月雖寅畏享福常懷翼翼之心

而聰明自民實賴昭之之鑒肅壇場而歲事望霄極以  
馳誠伏願受祉既多降年有永下逮含生之類溥壽  
域之躋

滿散朱表

伏以誕節載臨冲科備舉仰賴乾坤之造允儲家國之  
祥繼明照四方益系隆于炎祚修己安百姓期敷錫于  
洪恩

太一宮會慶節設醮青詞

伏以良月載臨實紀挺生之旦嚴君在上盍伸歸報之  
誠仰愬清都敬披丹悃伏願天心降格親壽延洪永承



膝下之歡常受域中之養

滿散朱表

伏以誕彌厥月敢專福祿之膺于萬斯年

淳熙二年

太一宮開啓會慶節道場青詞

伏以高在上固曰難謀懇：由中亦云易感當涼德  
始生之序念嚴君載育之恩祇竭精忠具遵道式冀格  
九清之祐同增萬壽之期

滿散朱表

伏以誕月載臨敢獨膺于戩穀嘉祥參集蘄上及于庭  
闈恪修清靜之緣仰助康寧之福誠心既達冲監必昭  
願益嚮于真風庸永綏于榮養

茅山宗禧觀開啓會慶節設醮青詞

伏以誕序斯臨荷天休而祇畏神山雖遠按仙式以精  
祈欽佇飈遊昭垂道蔭上則衍二親之壽下焉陶萬國  
之和曾是眇躬敢專鴻施

滿散朱表

伏以陰鴻下民疇不依于造化誕彌厥月願敢急于薰



修已宣三洞之科斯迪九宸之監願敷帝祉長佑邦裔  
更俾含生同躋壽域

萬壽觀開啟會慶節設醮青詞

伏以願德弗類荷天降休家用平康民以寧一是因誕  
序預祓殊庭庸達至忱仰干洪造冀延壽祉永奉親歡  
下暨群生成資餘蔭

滿散朱表

伏以孟冬之月載臨震育之辰長發其祥夙賴監觀之  
施企列真之歆駕宣秘洞之真科已罄肅恭必孚陰佑  
均壽昌于有衆綿基緒于無窮

淳熙三年

萬壽觀開啟天申節道場青詞

伏以推仁恩于三紀丕冒華戎介壽祉于萬年上齊箕  
翼雖神理不愆于報施抑人心難緩于禱祈是因彌月  
之臨敬致籲天之懇仰繫洪造垂鑒丹衷佑至養于無  
窮增修齡于有永

滿散朱表

伏以時當九夏節紀千秋預即祠庭恪遵道範茲崇成  
于勝會庸歸報于慈親壽祉常增願比乾坤之永福基  
彌固屹如山嶽之安



萬壽觀開啟會慶節道場青詞

伏以位臨大寶每依覆燾之仁月紀初生當致禱祠之  
禮潛誠心于七曜修勝事于三旬玉佩金璫並披粹籍  
珠中琳几敬佇真遊仰祈道妙之無方丕錫壽齡于有  
永更推洪施普暨含生

滿散朱表

伏以集眷佑于眇躬已綏多祐嚴禴禳于誕日更舉舊  
章備殫懇之誠諒格蒼之鑒上儲親祉常迪于康  
寧下錫民禧永銷于疢癘

淳熙四年

建康府茅山崇禧觀開啟天申節道場青詞

伏以山如句曲顯聖佑于茅君人似華封祝睿齡于堯  
帝茲屬誕祥之會載嚴道範之科遙命羽流敬邀鶴駕  
格無窮之祉庶篤祐于親庭儲有羨之休抑均禧于寰  
宇

滿散朱表

伏以流虹飛電遙逢載誕之辰率土溥天咸致永年之  
禱眷仙都之在望跨福地以標靈具殫禋恪之誠仰動  
希微之監冀垂鴻造宥相慈親福如東海之深測之益  
遠壽比南山之固仰之彌高



太一宮開啟太上皇后生辰道場青詞

伏以秋氣爰清應律甯于南呂坤儀至肅紀誕節于東朝預即琳宮虔修道範伏願穹旻降鑒祉福增延永佑光堯受萬方之至養上同金母亘億載以長生

滿散朱表

伏以坤德無疆將臨誕序詞庭有肅預講冲科熏修三日之間祈禱萬年之久載陳醮席仰格宸游庶因勝會之成益致嘉祥之集惟天為大固持俾壽之權如月之常願永容光之照

萬壽觀開啟會慶節道場青詞

伏以猥以眇躬紹于大寶干戈載戢年穀屢豐在涼德以何堪繫高穹之克相茲臨良月恭演冲科異因誕育之期少答生成之賜伏願鴻私下濟丹悃上通覆燾之恩徧周于海宇延洪之壽參集于庭闈

滿散朱表

伏以月紀初冬時逢載育預即邃嚴之館具修清靜之緣逮此崇成罄茲精懇三辰順軌斷丕錫于休祥四海迓衡庶永消于災害敢忘惕厲祇荷監觀

太一宮會慶節設醮青詞

伏以氣正上冬時維良月內循菲質載紀誕期欲歸美



于庭闈必輸誠于穹昊祓除廣宇演暢真風庶丕集于  
天休永同扶于邦祚

滿散朱表

伏以祗紹慶基載臨誕序臣之報上率崇彌月之勝因  
子之愛親敢怠萬年之善頌乃宣科于清夜用輸懇于  
層霄所祈冲監之下觀式俾嘉祥之來萃

建康府茅山崇禧觀會慶節設醮青詞

伏以祗紹帝圖夙依道蔭維茲良月時乃誕辰按十極  
之冲科崇三茅之勝會川塗雖邈悃幅自通徼福仙真  
豈眇躬之專享降康黎庶期壽域之同躋

滿散朱表

伏以月紀上冬時當載育遐瞻江表夙宅仙真祗祓壇  
塲具敷科式庶精誠之昭格致靈監之願綏上俾二親  
益隆于壽祉下令萬姓咸底于樂康

淳熙五年

萬壽觀開放天申節道塲青詞

伏以大德蕃昌應誕辰于中夏珍臺邃密崇勝事于三  
旬庶假熏修式享頌禱雲車風馬倘來顧于壇塲舜日  
堯年必永綏于壽祉

滿散朱表



月五公集  
玉堂類稿卷七  
伏以慈親在上方伸至養之恭炎律載中造紀誕彌之  
慶積鴻因于一月通丹悃于層霄地久天長冀延壽籍  
海涵嶽負仍固福基嘉與民生永依道蔭

太一宮天申節設羅天醮青詞

伏以天祐慈皇備錫康寧之福日臨誕節更伸頌禱之  
言壇場普供于神天燈燭交輝于晝夜寥々真境蘄垂  
鑒于忱衷永々修齡願益安于榮養

滿散朱表

律中蕤賓赫々炎圖之盛慶鍾慈極綿々鴻算之長茲  
廣設于醮筵既備成于順事衍無疆之曆期祇荷于天

休扶不拔之基尚永隆于邦祚

茅山天申節設醮青詞

伏以風自南而解愠當夏序之中分電繞北以呈祥記  
親庭之載誕瞻神山之地適企颺御之天臨祇誦寶書  
具嚴勝會伏願宸佑德金籙延年同皇祚以無疆嚮  
真風而罔怠

滿散朱表

伏以祇承慈父欣際誕辰乃眷名山有華靖館按冲科  
于十極徵厚福于群仙悃幅遙伸諒霄宸之不隔祺祥  
紛委知親壽之無涯



太一宮開啟太上皇后生辰設醮青詞

伏以月紀仲秋旬踰再浹鍾太陰之爽氣紀載誕之昌  
辰預即殊庭虔遵冲式緒琅函于永晝敷瓊席于良霄  
仰止高穹尚孚丹悃願言壽母丕集洪休

滿散朱表

伏以善則致祥天無私覆靜而獲壽人有常言念祗事  
于慈闈欣載逢于誕序婦誠道館祈福穹旻庶延億載  
之期永對萬方之養

萬壽觀開啟會慶節道場青詞

伏以猥繇涼德寅紹炎圖時寢格于小康年屢書于大

有靜言顯相實自高穹是因生育之期少答厖鴻之施  
清壇預被冲式載嚴曼壽敢專冀永隆于親養多祥誕  
錫更丕冒于海隅

滿散朱表

伏以初度載臨荷天心之降嘏清場夙啟依道範以宣  
科建茲勝事之成翕爾純釐之備既衍庭闈之筭亦安  
夷夏之民誓竭齋精仰酬覆幬

太一宮會慶節設醮青詞

伏以震夙之祥敢矜于一已延長之禱當及于二親恭  
即琳房敬敷瑤席伏願精衷上徹真馭下遊永綏壽考



之祺共保熾昌之祚

滿散朱表

伏以良月屆期記眇躬之初誕清宵歲事按秘洞之冲  
科所祈戩穀之臻玉衍庭闈之慶瞻言洪造鑿乃至忱

淳熙六年

茅山宗禧觀開放天申節道場青詞

伏以赤光照室蚤開濟于中興黃屋非心今優游于太  
極宜協天人之應併為壽祉之符遙即神山恪陳醮席  
百祥降善亶惟上帝之常萬歲聞呼尚容崇嵩之禮

滿散朱表

伏以誕節斯臨國家共慶壽齡之祝夷夏同心瞻句曲  
之竒峯駐列真之歛駕言馳悃幅脩罄薰修庶憑上善  
之因申衍大椿之筭

太一宮天申節設醮青詞

伏以飛電應期普天獻祝矧在行都之近有嚴真館之  
華敢急薰修用伸頌詠伏願上穹鑒德衆聖垂慈錫親  
壽于萬年均天休于四海

滿散朱表 兩首

伏以深仁厚德已全介壽之符秘籙真科更效延年之  
禱慶多儀之告備知冲鑒之聿昭尚俾君親永綏福祿



伏以欽承基緒載紀誕祥祇事尊親每思美報繹靈文  
于寶笈微福應于璿霄一曰壽以為先冀延丕祚萬斯  
年而無斁永嚮真風

太上皇帝丁亥本命設醮青詞

乾道六年

萬壽觀純福殿開啟太上皇帝丁亥正本命月

道場青詞

維乾道六年歲次庚寅十月丁未朔三十日丙子嗣天  
子臣御名伏為光堯壽聖太上皇帝丁亥正本命長生  
之月謹遣入內侍省東頭供奉官睿思殿候幹辦龍

龍圖天章寶文顯謨徽猷敷文閣幹辦講筵閣兼承受  
幹辦萬壽觀鄭邦美等于萬壽觀命道士一十四人就  
純福殿開啟靈寶道場一月日滿散設醮三百六十分  
位點丁亥長命燈一壇謹上啟聖位伏以冲虛高蹈方  
延安樂之年歷紀環周復次本元之月延九清之飈御  
按三洞之真科仰冀天聰俯從人欲益介無窮之壽常  
儲有美之休

滿散朱表

臣御名言伏為滿散光堯壽聖太上皇帝丁亥正本命  
長生之月道場者伏以祇紹慶基尊承慈爰屬上冬之



良月紀元命之嘉期豫闢清場虔輸丹悃冀默通于造化庸丕錫于壽昌

萬壽觀純福殿開啟 云云

維乾道六年歲次庚寅十一月丁丑朔十一日嗣天子  
臣御名伏以光堯壽聖太上皇帝丁亥本命之辰謹遣  
入內侍省東頭供奉官睿思殿祗候幹辦龍圖天章  
寶文顯謨徽猷敷文閣幹辦講筵閣兼承受幹辦萬壽  
觀鄭邦美等命道士七人就萬壽觀純福殿開啟靈寶  
道場一晝夜滿散設醮一百二十分位點丁亥長生命  
燈一壇謹上啟聖位伏以釋帝位以無為方永康寧之

福按日躔而有次載臨元本之辰恭即琳房具宣寶籙  
伏願聖真來格誠懋上孚陰陽均四序之和甲子衍萬  
年之數

滿散朱表

臣御名言伏為滿散光堯壽聖太上皇帝丁亥本命道  
場者伏以甲乙相推紀親庭之元命夙霄致禱宣道館  
之冲科已報精衷必蒙嘉應冀百祥之穰簡保萬壽之  
悠長

乾道七年

太上皇帝本命青詞 太一宮同



維乾道七年歲次辛卯正月丙子朔十二日嗣天子臣  
御名 伏為光堯壽聖憲天體道太上皇帝丁亥本命之  
辰謹遣具官甘澤命道士七人就萬壽觀純福殿開啟  
靈寶道場一晝夜滿散設醮一百二十分位點丁亥長  
生命燈一壇謹上啟聖位伏以暢臨寶位日奉慈顏載  
推元命之辰適在履端之月禱祈維舊頌祝更勤伏願  
誠悃上昭真游下格春乃四時之首淑氣常臻壽為五  
福之先修齡益茂

滿散朱表

臣 御名 言伏為滿散光壽堯聖憲天體道太上皇帝丁

亥本命道場者伏以歲律更端既衍親庭之顯號命元  
協日載嚴道館之冲科仰跂帝臨益享神佑錫壽符而  
滋永對天運以常新

太一宮介福殿開啟太上皇帝丁亥本命道場

青詞

維乾道七年歲次辛卯三月乙亥朔十三日嗣天子臣  
御名 恭遇光堯壽聖憲天體道太上皇帝丁亥本命之  
辰謹遣某官命道士二十一人于太一宮介福殿開啟  
靈寶道場一晝夜滿散設醮一百二十分位點長生命  
燈一壇謹上啟聖位伏以普天致養祇承慈父之顏元



命紀辰遠在季春之月後琳宮之勝地演寶籙之真科  
伏願誠格飈游壽延斗籍益介熾昌之福永繫眷佑之  
仁

滿散朱表

臣御名言伏為滿散光堯壽聖憲天體道太上皇帝丁  
亥本命道場者伏以天休狎至方垂<sup>佑</sup>于慈親月律再周  
乃荐臨于元命跋九清之法御宗衆妙之高風冀俯鑒  
于誠忱益丕延于壽祉

萬壽觀純福殿開啟太上皇帝本命道場青詞

七月十四日

伏以慶衍親庭歷載推于初度祥開霄極節正適于中  
元斡年披寶籙之文拔籍應丹臺之會壇場載肅香火  
具嚴莫飈御之俯臨紛靈釐而下集

滿散朱表

伏以惟孝可以事親當祈曼壽惟誠可以格帝務竭寸  
心遠元命之紀辰望層霄而薦信冀回冲鑒永錫殊休  
乾道八年

太一宮開啟太上皇帝丁亥本命青詞

正月十八日

伏以乾坤輔德宜壽祉之無疆臣子愛親在祈禳而有  
舊時臨春首日協命元恪遵三洞之科冀衍萬年之筭



仰繫洪造垂鑒丹衷

滿散朱表

伏以歲紀載新每祝嚴君之壽日旬六浹復臨元命之辰祇被清場脩成勝事仰賴神天之鑒俯昭人子之誠永錫閑休益隆榮養

淳熙二年

太一宮介福殿開啟太上皇帝丁亥本命道場

青詞

維淳熙二年歲次乙未九月己卯朔九日嗣天子臣  
名恭遇光堯壽聖憲天體道太上皇帝丁亥本命之辰

御

謹遣入內侍省東頭供奉官幹辦內東門司幹辦太一宮霍汝弼命道士二十一人于太一宮介福殿開啟靈寶道場一晝夜滿散設醮一百二十分位點長生命燈一壇謹上啟聖位伏以乾稱乎父紀元命之休辰兌正乎秋適重陽之令節按冲科于瓊笈陳芳荐于瑤壇延望真游具殫誠悃冀敷隆于道蔭永迓續于帝齡

滿散朱表

臣御名言伏為滿散光堯壽聖憲天體道太上皇帝丁亥本命道場者伏以日六十而甲子乃周協初躔于密度歲八千而春秋不老祝曼壽于嚴君闡琳宇以欽宗



荷璿霄之降格祈禳有恪既成勝妙之緣清靜無為必  
介延長之祉

太一宮開啟太上皇帝丁亥本命道場青詞是年

閏九月雖是十一月十日猶是十月節故云俱應元命

伏以時臨良月日浹初旬按曆而推俱應親庭之元命  
顙天而禱冀延斗籍之嘉祥高詠寶書敬陳瑤席伏願  
精誠上達飈御下臨丕錫四時之休永綏億載之養

滿散朱表

伏以欲親之壽常懷頌禱之心紀命之元尤謹禳祈之  
會遯瞻秘館備演冲科逮熙事之崇成知圓穹之眷顧

尚恢鴻施永續蕃祺

萬壽觀純福殿開啟太上皇帝丁亥正本命長

生月道場青詞

維淳熙二年歲次乙未十月戊寅朔某日嗣天子臣御

名伏為光克壽聖憲天體道太上皇帝丁亥正本命長

生之月謹遣入內侍省東頭供奉官睿思殿祇候幹

辦內藏庫幹辦萬壽觀甘昺等于萬壽觀命道士一十

四人就純福殿開啟靈寶道場一月日滿散設醮三百

六十分位點丁亥長生命燈一壇謹上啓聖位伏以倦

繁機而脫躡宜擁天休推元命之循環遠臨月建修三



旬之道果斬萬壽之帝齡伏願眾妙扶持上清眷佑永錫無為之祉敢忘不宰之功

滿散朱表

伏以月在圍陽協命元于慈父誠通霄極嚴範于殊庭肇朔旦以宣科逮晦辰而迄事冀集天真之佑丕延眉壽之期

太一宮介福殿開啟太上皇帝丁亥本命道場

青詞

維淳熙三年歲次丙申二月丁丑朔十一日嗣天子臣御名恭遇光堯壽聖憲天體道性仁誠德經武緯文太

上皇帝丁亥本命之辰謹遣入內侍省東頭供奉官幹辦御藥院提點資善堂攢官檢察承受幹辦太一宮兼幹辦璇璣觀霍汝弼命道士二十二人于太一宮介福殿開啟靈寶道場一晝夜滿散設醮一百二十分位點丁亥長生命燈一壇謹上啟聖位伏以親壽延洪甫慶從心之歲春陽駘蕩又臨元命之辰載被殊庭敬延真馭庶假薰修之力益增安樂之年仰冀高明俯昭悃悃幅

滿散朱表

伏以日承慈極思曲盡于誠心時屬仲春遠游臨于元



命有嚴道館載演冲科既克就于多儀諒丕延于萬壽  
願依洪造永錫靈釐

萬壽觀開啟太上皇帝丁亥本命道場青詞 六

月十四日

伏以火見金伏應炎圖有赫之期箕張翼舒占聖父無  
疆之壽載因元命祇演真科庶資清靜之緣彌介康寧  
之福九霄在望一意以祈

滿散朱表

伏以月紀林鍾日瀕既望方極幅幘之養遠臨元命之  
辰熙事既成忱衷斯罄冀衍難窮之算長扶不拔之基

萬壽觀開啟太上皇帝丁亥本命道場青詞 八

月十五日

伏以天佑慈親日安榮養惟是中秋之節遠茲元命之  
辰祇闢清壇肅延真馭伏願具孚誠悃丕錫吉康光勳  
壽星常見丙丁之度數超巧曆莫窮甲子之期

滿散朱表

日協命元每六旬而乃遇天從人欲惟萬壽之是祈當  
月輪正滿之秋乃醮席慶成之夕願恢鴻施錫純嘏于  
親庭誓竭丹心依至仁于道蔭

萬壽觀開啟太上皇帝丁亥本命道場青詞 十



月十六日

伏以月紀孟冬方過下元之節慶鍾慈父載臨初度之  
辰爰即壽宮具陳章醮八遐九外略無塵翳之千億載  
萬年宜有壽齡之報仰祈元造俯鑒忱衷

滿散朱表

伏以六旬紀日臨慈極之本元八會宣音按瑤壇之科  
式陰陽不言而可喻誠心有感而必通矧東宸書積善  
之功諒非一日則南斗注延生之籍宜介萬年

淳熙四年

萬壽觀純福殿開啟太上皇帝丁亥本命道場

青詞 四月十八日

伏以誕辰祝聖將臨一月之期元命紀辰載值六旬之  
浹因人心之善頌闢道館之清場羽士精虔華燈炳煥  
冀帝臨之有赫延親壽于無窮併集祺祥俯均家國

滿散朱表

伏以月當孟夏日近中休推親庭元命之辰按仙洞長  
生之籙良宵載肅勝會告成天聽甚卑必鑒拳之懇  
帝益永更儲簡之祥

萬壽觀純福殿開啟太上皇帝丁亥本命道場

青詞 八月二十日



伏以月臨南呂日決再旬曆書秋序之平分史候壽星  
初之見惟時聖父實紀命元修香火之緣冀潛通于精  
意益松椿之壽庶長奉于慈顏

滿散朱表

伏以上協帝心知與齒之方永下孚民志諒祝聖以彌  
勤載臨元本之辰備舉薰修之典伏願天人交助丕延  
萬壽之期福祿兩崇永對四方之養

萬壽觀純福殿開啟太上皇帝丁亥本命道場

青詞 十月二十一日

伏以日奉慈顏思形孝治屬載臨于元命庸備舉于醮

儀懇之誠倘潛通于帝所綿之壽斯增集于親庭

滿散朱表

伏以月紀上冬日踰中泮按司天之舊曆紀慈父之元  
辰申飭羽流具嚴道果茲訖薰修之禮諒儲高厚之休  
尚俾君親永綏壽嘏

太上皇帝丁亥本命青詞 十二月二十三日

伏以支干配日載閱月而乃周臣子事親萬斯年而是  
祝茲因元命敬被清壇宣永晝之科儀盛良宵之香火  
益高在上庶幾精意之通降鑒不違所冀休祥之集

滿散朱表



伏以甫經臘月密近壺春嚮乾坤道泰之時伸君父命  
元之祝祺祥有倣願偕歲運以俱新清靜無為常若化  
工之不宰忱言斯至陰陽必從

淳熙五年

太上皇帝丁亥本命青詞 七月二十六日

伏以命元之紀無窮六旬斯浹親壽之延有永一意以  
祈茲仰格于真游庸備輸于誠悃伏願祥開霄極福集  
慈庭偕日月以常明與乾坤而等久

滿散朱表

伏以月往日來載值本元之旦天長地久必資清靜之

緣爰屬孟秋備成勝事注生南斗祈益永于慈齡錫福  
庶民願愈隆于孝治

萬壽觀開啟太上皇帝丁亥本命道場青詞 九

月二十七日

伏以天扶慈極方永壽齡霜肅杪秋又臨元命恭即邃  
清之館具陳勝妙之科伏願精意潛通鴻休允答無為  
之樂坐閱于萬年有羨之祥俯均于四海

滿散朱表

伏以惕臨寶位恪奉慈親載推元本之辰備講薰修之  
禮颺游斯集純嘏是宜久照常願比方壺之日月凝



寒愈茂冀同上古之松椿

萬壽觀純福殿開啟太上皇帝丁亥本命道場

青詞 二月二十二日

伏以春瑄將分紀親庭之元命宵躔在望啟秘館之冲  
科寶供陸離嬰香馥郁繁精誠之上達致飈御之下臨  
顯相慈皇益介延長之壽瞻言道蔭永依保佑之仁

滿散朱表

伏以脫屣寰區方延萬壽循環元命載浹六旬既申頌  
于靈篇亦備陳于馨荐深惟誠懇諒格鑒觀錫有美之  
殊休助無為之至樂

萬壽觀純福殿開啟太上皇帝丁亥本命道場

青詞 四月二十三日

伏以祗奉親歡日伸榮養屬履正陽之月載臨元命之  
辰按秘洞之真科延列真之歛駕庶徼天祉益永帝齡  
緬企靈觀俯垂丕佑

滿散朱表

伏以月瑄再周首紀恢台之序親庭曼壽環臨元本之  
辰按丹籙以宣科望紫霄而籲懇尚孚冲鑒密導殊休  
算已永而彌增福方崇而更積齋顯斯至眷佑是期  
萬壽觀純福殿開啟太上皇帝丁亥本命道場



青詞 六月二十四日

伏以間燕怡神安受萬方之養本元紀命遠臨季夏之  
辰惟普天輸祝聖之誠惟妙道著延祥之式是緒秘典  
夙啟清壇祈默下于靈觀益增隆于壽筭

滿散朱表

伏以欽惟聖父燕處皇居既清靜以無為宜康寧之未  
艾茲推辰于元命載歲事于良霄誠愈罄而愈虔期上  
通于穹昊壽彌萬而彌永迄垂佑于邦家

玉堂類藁卷第十四

終

玉堂類稿卷第十五

周益文忠公集一百十五

雜奏告祈謝青詞朱表

旦望表本附

乾道六年

郊祀大禮預告天慶觀開啟道場青詞

九月二十七日

欽承上帝固專人事之修交舉盛儀必假天時之相茲  
竭誠于穀旦以徼福於先期仰賴監觀迄臻况施

滿散朱表

伏以奉珪奠幣將款泰壇降祉儲祥預祈道蔭交精稷  
於九天之上堯清明於三日之間儻迄嚴禋虔昭事

郊祀大禮太一宮預告祈晴青詞

十月十一日



伏以事之大者禮必嚴誠之勤者文亦稱故三歲一郊  
之親祀有千官萬旅之駿奔是資景氣之晏溫庶竭齋  
明而寅奉豫祈冲鑒垂聽忱辭假霽色於隆冬考盛儀  
於至日

滿散朱表

伏以大祀一純在丹衷之當勉美光三燭捨洪造以疇  
依肆祇祓於壇場仍備遵於科式冀憑道妙丕錫神休  
迄臻天日之清明獲拜乾坤之况施

又

伏以陰陽大柄造化所專燎瘞上儀國家攸重欲休祥  
之來格在祈禱以備殫三光宣精倘開於霽景七日來  
復斯迄於嚴禋

大禮畢告謝天慶觀青詞

伏以祇率臣工躬脩郊類荷高靈之純嘏致庶事之慶  
成竊內省於菲涼益重懷於兢畏乃消穀旦祇祓殊庭  
庶憑清靜之緣少答庀鴻之貺更祈道蔭永阜民生

滿散朱表

伏以承天之序祇荷於鑒觀饗帝於郊恪伸於昭報慶  
上儀之獲展戴洪造以彌深不假重脩曷殫悃幅茲載  
陳於嘉薦庸仰格於真游庶迪神休永綏邦祚



加上太上尊號奏告天慶觀景靈宮報恩光孝

觀青詞

伏以講上儀於三歲俯愧德馨加榮號於二親仰圖美報實廣旻穹之賜敢於涼菲之能將舉彌文豫伸昭告冀承顏之有永俾曼壽之無疆

乾道七年

立皇太子奏告天慶觀景靈宮報恩光孝觀青

詞 二月十日

伏以枚卜親賢命居儲副以助承於宗廟以係望於華夷祇達誠心聿陳芳薦冀神游之昭格錫邦祚之延長

淳熙二年

加上太上尊號奏告天慶觀景靈宮報恩光孝

觀青詞

伏以耆艾熾昌帝與齡而可卜鋪張揚厲臣歸美以當然不崇父母之鴻名孰顯天人之並况茲敬消於陽復將備講於禮容祇告先期併徵後福

淳熙三年

立皇后奏告天慶觀景靈宮報恩光孝觀青詞

伏以表正宮庭久勤婦職登崇位號倣正后儀已消冊授之期正賴帝臨之况茲惟盛典預薦精誠



郊祀大禮奏告景靈宮青詞  
伏以觚壇至日以躬郊將舉合祛之禮原廟先期而朝  
獻具存分詣之儀祇命臣工敬瞻像設冀博恢於慈造  
庸克相於嚴禋

淳熙四年

仲春醮祭吳山忠壯英烈威顯王青詞

伏以江海遙連久朝宗於都會風濤相激常軫慮於民  
居當玉瑄之分春即靈祠而歲事伏願天心有相神力  
無邊約潮汐以安行屹堤防而增固

太常寺進呈安奉仁宗皇帝玉牒徽宗皇帝實

錄  
奏告景靈宮青詞

三月九日

伏以仁廟萬年之寶牒甫就編摩佑陵一代之政經載  
嚴纂錄皆國家之攸重繫祖烈之有傳安奉匪遙啟聞  
敢緩並告汗青之日尚孚精白之心

仲秋醮祭吳山忠壯英烈威顯王青詞

伏以海率再潮獨抵錢塘而聲震歲分四序每乘秋氣  
而勢雄矧屬時巡實蕃生聚即神祠而重複資道蔭以  
禱祈庶憑上善之緣永作下民之佑帆檣隱：有利於  
往來隄岸迢：無憂於蓄缺

淳熙五年



仲春祭吳山忠壯英烈威顯王青詞

伏以濤聲動地喧飀萬竅之風雷浪勢黏天指顧千堆  
之霜雪匪資帝力孰奠民生卜春壇之平分啟醮筵而  
祇後仰賴神明之相濟施約束之功自海而江水常行  
於無事惟舟及岸人胥免於他虞

仲秋祭吳山忠壯英烈威顯王青詞

時巡歲久生齒日繁當古今潮汐之衝聚億萬室廬之  
衆諒非陰相孰底奠居卜秋序之平分即祠庭而祇後  
底依乘於道蔭益恢廓於神功波浪排空巨岸弗摧於  
激射舳艫啣尾行人永保於寧安

淳熙六年

仲春祭吳山忠壯英烈威顯王青詞

伏以萬古波濤中分二湖一時興勢密拱九重繫潮汐  
之安行賴聰明之顯相茲臨春仲爰舉邦彝即祠宇以  
祓除啟醮筵而祈報冀帝臨之有赫助神力之無窮朝  
宗彌廣於前功軌道更綏於後福

仲秋祭吳山忠壯英烈威顯王青詞

伏以錢塘之潮盧肇所賦謂奔騰獨起視衆水以特殊  
故滂霈自興當仲秋而尤盛粵從巡狩滋劇雄觀爰即  
靈祠夙遵道範伏願天心降格神力扶持波濤無薄激



之虞岸谷共安平之利

淳熙七年

玉牒所玉牒殿安奉仁宗皇帝哲宗皇帝玉牒

前一日景靈宮奏告青詞 四月四日

伏以續仁祖之信書又成十載刊泰陵之舊牒將詔萬年既尊閣之有期在啟聞而敢怠仰祈靈鑒垂佑丕圖

乾道六年

郊祀大禮：畢奏謝景靈宮萬壽觀聖祖天尊

大帝元天大聖后昊天玉皇上帝表詞本

伏以時當三載氣應一陽帝命不違成國家之熙事天

休滋至浹雨露之湛恩允賴博臨敢云能饗爰按冲科之式少伸昭報之誠

郊祀大禮：畢奏謝景靈宮萬壽觀會聖宮應

天啟運宮章武殿永佑陵殯宮昭慈聖獻皇

后殯宮諸帝后表詞本

伏以天地神祇既講合祛之禮祖宗功德又修徧饗之儀惟降嘏之孔皆賴發祥之云遠若稽舊典祇薦忱辭以昭有相之功以答無疆之惠

郊祀大禮：畢奏謝昭慈聖獻皇后殯宮永祐

陵殯宮表文



伏以下歲習祥迎陽徧饗既受百神之况亦均四海之  
釐仰賴遺休迄成鉅典稽舊章而致告望拱木以馳情

郊祀大禮：畢奏謝諸陵表文 共二十九通  
十二月十日

臣 御名言伏為郊祀大禮：畢奏謝者伏以南極景長

載陳掃地之祭西陵禮隔遙想在天之靈既迄曠儀益

懷遺烈稽舊章而致告冀靈眷之永孚

加上尊號奏告諸陵表文 共二十九通

臣 御名言伏為大禮慶成加上光堯壽聖憲天體道太

上皇帝壽聖明慈太上皇后尊號寶冊前二日奏告者

伏以蕝儀郊廟既不擁於繁禧歸美庭闈肆並加於顯

號若時慶典實越前聞遙瞻如在之靈敢致先期之禱  
冀孚誠意益佑昌圖

奏告永祐陵殯宮四通昭慈聖獻皇后殯宮表

文一通

詞並同前 但改遙瞻作式瞻

乾道七年

昭慈聖獻皇后及永祐陵殯宮補種窠木修飾

上下宮奏告表文 正月二十四日

伏以藏衣冠於禹穴久寓神游行兆域於漢陵具存邦  
典繕修惟舊封植以時將並飭於衆工尚永綏於靈顧



奏告顯恭皇后表文

伏以瞻園陵於洛邑雖阻畿疆祔宮寢於稽山具存兆域繕修惟舊下詞同前

仲春薦獻紹興府兩殯宮表文 二月十三日

臣御名言伏以歲華逾邁春律載中寢廟獻羔已遵於呂令陵官掌祭更講於漢儀遙伸追遠之誠庶盡奉先之孝

仲春薦獻諸陵表文

臣御名言伏以曆正仲春感載濡於雨露心馳西洛悵遐阻於山河恭惟尊謚皇帝靈鑒在天聖謨皇后改作徽音

垂後秩上陵之典禮徒切望思絕寓祭之權宜愈增愴慕

淳熙二年

加上太上尊號奏告諸陵表文 共二十九通

伏以俾壽而昌慶庭闈之難老惟名與器偕年德以俱新卜一陽云復之辰講三代未行之禮茲為國家之盛必契神靈之心願鑒忱誠益流丕祉謹差某官奉表奏告以聞

立皇后奏告諸陵表文 二十四通同一詞

伏以禮經貽訓國治本於家齊易象垂文外正於由內



熾是求邦媛就正坤儀念典冊之將行諒神靈之咸喜  
遙瞻陵寢預薦菲誠

修奉昭慈聖獻皇后下宮重換殿中間後步望  
板并神帳上雲板損折及帳前微有漬黑畢  
工奏告遷神御還殿正奉安表文

伏以再造皇家內資隆祐之助肇營仙寢近寓稽山之  
原比稍飾於下宮常暫遷於遺像逮茲還御敢不薦誠  
顯肅皇后殿皇堂磚面低陷開裂奏告表文

伏以南渡權宜卜會稽之陵寢上宮備設棲顯肅之神  
游而殯殿之闡皇堂之上微聞陷裂亟謹修營仰惟如

在之靈鑒乃奉先之謹禮差某官奉表奏告以聞臣  
御  
名誠惶誠懼頓首頓首謹言

六月初十日緝量到上宮殯殿御倚子并茶床下當  
中磚面低陷五寸西南角起裂六寸東南角起裂二  
寸東西共濶一丈有餘南北長五尺有餘當日西時  
皇堂地面聲響其御倚子開裂一處陷脚踏子不見  
并御倚倒側及東西角起裂磚面各約高一丈

淳熙五年

仲春繕修補種昭慈聖獻皇后殯宮永祐陵殯

宮表文 共六通同一詞



臣御名言伏以宸遊寢邈仙寢具存當春律之告中飭  
陵官而按舊宮庭器服咸謹於繕修兆域松藥並從於  
補治仰綏靈顧遙致忱衷

景靈宮諸神御并永祐陵殯宮昭慈聖獻殯宮

會聖宮等 諸帝旦表 閏六月

臣御名言伏以林鐘之律六寸於今一氣之未移梧桐  
之葉十三在昔九州之不異恭惟尊號皇帝仁周品彙  
德邁古初僊馭賓空闕衣冠而愈久靈威燾後偕正閏  
以常新

諸后旦表 同前

臣御名言伏以暑徂六月斗指兩辰居門雖詔於周官  
告朔當朝於魯廟恭惟尊號皇后德隆坤順體合乾剛  
邈矣徽音方貽百歲之範帳為舊典空備五時之衣

諸帝望表 同前

臣御名言伏以鷄火昏中仍退棲於酉位蟾輝夕滿繇  
積數於陽餘恭惟尊號皇帝德澤在民規摹裕後周年  
過卜敢忘文武之功堯曆授時尚想義和之政

諸后望表 同前

臣御名言伏以溫風存至適臨小備之期皓月載圓追  
感太陰之照恭惟尊號皇后協功列聖流慶後人彤管



光輝已著無窮之聞王衣寂寞惟深如在之思

明堂大禮畢奏謝景靈宮萬壽觀會聖宮應天

宮應天啟運宮章武殿永祐陵殯宮昭慈聖

顯皇后殯宮諸帝后表詞本

伏以蒐講曠儀潔蠲路寢乘季秋之肅氣摠宗祀之精誠祇荷鑒觀備臻况施恪伸昭謝庸告熙成仰冀在天之靈益綏裕後之福

明堂大禮畢奏謝聖祖天尊大帝元天大聖后

昊天玉皇上帝表文

伏以萬寶成秋九筵稽古帝資四海之助上接三神之

歡翕臻休祥眷賴鴻造載陳誠悃昭答鑒觀

明堂大禮畢奏謝昭慈聖獻皇后殯宮永祐陵

殯宮表文

伏以大饗明堂格王之盛則度筵路寢列聖之宏規逮臻典禮之成知契神靈之意載瞻仙寢近在稽山祇達封章恪伸謝悃尚監奉先之敬永垂裕後之恩

奏謝諸陵表文

伏以大饗明堂格王之盛則度筵路寢皇祐之宏規聿臻典禮之成必契聖神之意逝瞻仙寢遠在洛師遙貢封章

下詞同前



玉堂類稿卷第十五 終

